مطبرعات الهدينة العدامة لقد عبور الثقافة

اهداءات ٣٠٠٠٢ العامة لقصور الثقافة القامرة

اللهم اجعله خين

لينين الرملي

مطبوعات المينة العامة لقصور الثقافة

- اللهم اجعله خير
 - ەمسرحية
 - لينين الرملى
 - الطبعة الأولى
- مطبوعات الهيئة (٢٠)
 - القاهرة ١٩٩٩

رقم الايداع ، ١٠٥٩٧ / ٩٩

شركة الأمل للطباعة والنشر ت: ٣٩٠٤٠٩٦

سلسلة مطبوعات الهيئة

رئيس مجلس الإدارة ورئيس التحسرير د. مسطفى السرزاز

أمين عام النشر مسحسمت كسشيك

الإشراف الفني د. محمود عبد العاطي

مديرالتحرير مسحسمسك أبوالمجسد

المراسلات:
 باسم مدیر التحریر علی العنوان التالی:
 ۱۱ شارح أمین سامی - القصر العینی
 القاهرة - رقم بریدی ۱۱۵۹۱

مشروعية الخلم مكفولة في الوطن الحر

يعشق «لينين الرملي» الفانتازيا ويستخدمها في جل أعماله، كإحدى وسائط التعبير الجمالي عن رؤيته ومناوشته في ذات الوقت، لذا يصل في مسرحيتنا هذه إلى أقصى حدود الفانتازيا انطلاقا من قاعدة تكنولوجية بينى عليها تصوره بإمكانية الوصول إلى جهاز راصد للأحلام، لاقط لأفكارها وهي ما زالت بعد جنين العقل، وقادر على تسجيلها، ومن ثم استخدمها ضد خروج الحالم عما تراه السلطة مناوئاً لها، حتى ولو في الأحلام، وإذ يتعمد الكاتب في مسرحه مزج ما هو خيالي بما هو واقعي، مراوغة لهذا الواقع المتصدى بقوة، والساعي لكشف عوراته، بحس نقدى ساخر، ينطلق ببنية الدرامية هنا من مكسن بين المقابر، وموظف صغير، وحلم مشروع، ليناقش هموم الأحياء، والإنسان المصرى كلية، مستهدفا صياغة دراما مثيرة للعقل الشاب، المتمرد بطبيعته، المتحمس لكل ما يخدش وجه حياته، وهو ما يجعل مسرح لينين الرملي مسرحاً شبابياً، يخدش وجه حياته، وهو ما يجعل مسرح مثير للجدل معاند للحياة جذاباً، ومحرضاً على التفكير وهو مسرح مثير للجدل معاند للحياة الراكدة، مستفر للعقل الباحث عن الإثارة في إبداع فني لاذع.

دع المشاهد يفكر، دعه يعتقد، ولنقل مع لينين الرملى، دعه يحلم. ذلك النداء الذي يتبناه في مسرحيته «اللهم اجعله خير»... فمشروعية الحلم مكفولة في الوطن عندما يكون حراً.

د.حسن عطية

كلمةالمؤلف

يحاكم بطل هذه المسرحية على الأحلام التي يراها في منامه، سواء أحلامه الوردية أو كوابيسه المرعبة.

هذه هي فكرة المسرحية التي حلمت بها طويلاً.

ولكن عندما فكرت أن أحكى لكم حلمي، كان على أن أروى بعضه..

أو أبتلع حلمي كله واسكت.

فوضع المؤلف دائماً يبدو كوضع الشاهد في المحكمة. وهو وضع خطير، فهو يقسم أن يقول الحق ولا شيء غير الحق.

ولكنه قد يشهد أحيانا بالزور فيتسبب في إدانة المتهم البريء.

وقد يشهد أحياناً بالحق فيصبح هو المتهم الأساسي!

ولذلك أقسم أن أقول (بعض) الحق ولا شيء غير (بعض) الحق!

الأمانة تقتضى أن أصارحكم بأن شهادتي ناقصة غير مكتملة.

وإن كنت أقسم أننى لم أحرفها.

أناهنا لا أكذب ولكنى أتحفظ!

فاذا كان هذا النص يروى حلما ناقصا أو يكتنفه بعض الغموض، فأملى أن يكمل المتفرج الذكي تفسير معانيه ودلالاته.

باختصار..

لم اقل كل ما شاهدته في منامي ..

وبعباره أدق.. كل ما شاهدته في صحوي!

ولهذا أفضل أن أقدم لكم المسرحية بنفس المرافعة التي يدافع بها بطلها عن نفسه في نهايتها:

حضرات القضاه.. أنا معترف.

ويقر أمام حضراتكم..

إن أنا مختلف.
أحلامى جريمتى فى عرفكم.
لان الحق غايب عنكم.
الأمر الواقع بكره هينتهى..
والحلم خالد
غصب عنكم كل الاحلام جميلة.
والسيادة فى النهاية للخيال
كل الأحلام حقيقة
وبقاء الحال محال.
بقاء الحال محال.

لينين الرملي

الشخصيات

١- سراج عبد الصبور ٥٦ سنة محاسب في المؤسسة العامة

٧- خليل ابن خالته وشاهد نفي. محاسب

۲- حنان خطيبته وزميلته ۲۷ سنة

3- **الأم** أمه

٥- النيابه ممثل النيابة في المحكمة

٧- بليغ فصبح المفتح محامي

٧- مخلص ابو زيد القدائي محامي متطوع.

٨- فؤاد الشماشرجي رئيس مجلس إدارة المؤسسة العامه

٩- السكرتيرة سكرتيرة فؤاد الشماشرجي

١٠ - القاضي

١١- الضابط

۱۷ – عجرمة مجرم مسجون

17- الزميل زميل سراج في المؤسسة

امينه خيرية - صديق زملاء سراج في المؤسسة.

مستشار ۱ ـ مستشار۲.

قدمت المسرحية لأول مرة في ٢٧ يوليو١٩٩٧ على مسرح بيرم التونسى بالاسكندرية من إنتاج فرقة المسرح الكوميدى، وأخرجها محسن حلمى،

الفصل الأول

ىخول

ـ في الظلام نسمع عبارة :

صبوت: ألو ٥٢ ينادى بدأ التسجيل المطلوب.. حول

- ـ بيدأ استعراض غنائي راقص لسراج وحنان بالاشتراك مع زملاء الاثنين في العمل.
- الاستعراض يعبر عن فقرات متناثرة غير واضحة تماماً من طم يعيشه سراج (من حلم الأمل) وهو بعض ما سوف نراه على نحو أوضع في مشاهد تالية.
 - _ في نهاية المشهد نسمع اتصال لاسلكي :

مىوت: ألو ٥٢ ينادى، تم التسجيل المطلوب.. حول ثم صوت سارينة بوليس.

إظلام

المشهد الأول

المنظر: مسكن سراج

عباره عن حجره في مقبره، المكان ضيق والسقف منخفض الغايه. باب المسكن وممر الداخل ونافذه يدخل منها ضوء الصباح فتبين المنظر.

سراج وخليل نائمان على أريكه أو مرتبه وقوقهما ملاء الاثنان يصدران أصوات شخير عاليه بالتبادل كانهما يعزفان سيمقونيه سراج بشد الملاء نحوه. خليل يحاول شدها ناحيته.

سراج: يتقلب ويرفص خليل بقدمه

خليل: يزيح قدم سراج بضيق ويبتعد لحافة الفراش

سراج: يقترب منه ثم يلقى بيده عليه

الام تظهر من الداخل تحمل صينية الإفطار وتفتح النافذة فيدخل المزيد من الضوء

الام: اصحا يا سراج .. اصحا يا خليل صباح الفل والياسمين

فجأة تسمع اصوات مسراخ وعويل تأتى من الخارج

خليل: يهب من نومه مذعورا ويصرخ بدوره ايه؟ فيه ايه؟ ليه؟

الام: صباح الخير يا خليل.

خليل: خير منين؟ ايه الصوت دا يا خالتي؟

الام: ضاحكة وانت لما تكون نايم في تربة عايز تصلحي على صلوت زغاريت؟

خليل: بس ع الصبح كده؟ دى حاجة تغم النفس.

الام: لو قعدت معانا يومين هنتعود.

خليل: اتارى سراج في سابع نومه. لا وباينه بيطم كمان.

الام : دا ما بيبطلش احلام بالمره. صحيه عشان تفطروا.

خليل: اصحا يا سراج.

سراج: يحتضن الوساده ويقبلها

خليل: هنيالك يا عم.

سراج: يتقلب ويأخذ وضعا غريبا على يديه وقدميه

خليل: هامسا ودا وقته انت راخر؟ امك شايفاك ما يصحش، فوق.

سراج: يزوم ويغمغم سيبنى يا خليل سيبنى.

خليل: يسحب الملاءة من فوقه مش سايبك.

سراج: يعتدل ويتمطى ثم يعود للنوم طب أكمل اخر حته في الطم ويعدين أصحى.

خليل: قوم. اتأخرت على شغلك.

الام: خير؟ حلمت بإيه المره دى؟

سراج ينهض من الفراش بالجلباب بنشاط

سراج: حلمت اللهم اجعله خير..

حلم طويل وجميل.

حلم إنما إيه... يا سلام

خليل: يا سلام... يا سلام

سراج: عدت عليا الصور... صور كتير مالهاش عدد

بيت صغير وشجرة وضليلة.

وخمسة وخميسة وبنت بضفيره

وزغروطه.

وشمس شموسه وطاقه مفتوحه

وكسوة شتا وحوش مدرسه

وسبوره وقلم وكتاب وعلم

وشرايط ملونه وناس مرأططة ومزيكا حطت عليا السكينه.

الأم: بركاتك يا شيخ سراج. حاكم أنت احلامك ما تنزلش الارض ابدا.

سراج: بخجل استغفر الله العظيم يامه.

خليل: هيه وحلمت بأيه كمان؟

سراج: حلم جنان .. حلمت كأنى في عالم تاني وأنا-فيه إنسان

الأم: بشرة خيريا حبيبي بشرة خير.

سراج: حلمت ان الناس بتشرب نخب العمل

وفينا واحد مفكر بيقود العمل حلمت كأنى .. رجعت لطفولتى

بتنطط واجرى ولاحد يحصلني.

حلمت كأنى بالونه مطيراني

وملايكه شايلاني.. وبتغنى.

ابدر على اخواني، شوكلاته وبنبوني

الام: يا ضانيا يا بني.

سراج: وشفتك يا أمى وشفتك يا صاحبي.

وشفت أمسى ويومى وغدى

وشفتك يا بلدى وجيوش الظلام تعدى

الام: يارب حقق له كل اماله.

واهديه وريح باله،

سراج: صحتوني ليه؟ كان لسه بدري.

الام: يسعد صباحك يا ابني.

الام تخرج إلى المر

خليل: بقى حلمت بينا وبالشغل؟ هنو الكلام دا تقوله لأمك.

انا شايفك حاضن الوساده الخاليه ويتشخر.

سراج: ساعتها كنت بحلم بالجو.

خليل: ايوه كده.. اهى دى الأحلام والا فلا.. احكى لى بقا.

سراج: عيب يا خليل. دي خطيبتي.

خليل: طب حته صغيره. احكى عشان خاطرى.

سراج: حلمت اني.. انا وحبيبتي..

بناكل حب وسعادة وهناء

عايشين في خيمة أيواء

خليل: يخيبك. حتى ف احلامك مش قادر تنسى الفقر.. طب احلم بفيلا.. احلم بقصر.

سراج: الخيمه منوره ومنصوبه ف جنينه

مكشوفة لكل الخلق واحنا بنحضن بعض

وجحيم من القبل مالهاش عدد

خليل: خش ف عبى. قبلات وبس؟

سراج: هس... صحتونی لیه؟ کان لسه بدری.

خليل: طب انا داخل اغسل وشي ارجع الاقيك لابس.

خليل يخرج

سراج: حاضر يرقد على الفراش فى الحال ويسحب الملاءة فوقه يتجدد صوت الصراخ والعويل من الخارج. تبدأ نفس موسيقى الحلم ولكن نغماتها تصبح أكثر عنفاً وصراعاً

إظلام جزئى وبقعة ضوء على وجه سراج وهو يتقلص ويغمغم.

سراج: ابعدوا الأشباح. ابعدوهم عنى

تدخل الام وخليل

الام: انت سبته ينام تاني؟ اه يا غلبي ياني.

خليل: يهزه وبعدهالك يعنى. فوق ياسراج اصحا يا بني.

سراج: يصحو مذعورا يردد اللهم اجعله خير.. اللهم اجعله خير.

خلیل: خضتنی یا شیخ. فیه ایه تانی؟

سراج: حلمت اللهم اجعله خير بكابوس عجيب ومخيف.

الام: يا لطيف.. يا لطيف

سراج: مرت عليا الصور.. طيف ورا طيف

سما مدخنه وبيوت متهدمه.

وريح بتصفر وقمر اصفر

زهره دبلانه وسفينه غرقانه

- الام: باندمدتي يانا..

سراج: حلمت كأنى.. عايش في غابه

وماشى في متاهه.. بواجه لوحدي..

افاعي وديابه وشفت فيها بشر.

بشكل التيوس والبقر.

وجثث بتتكلم وجثث بتبكى.

ورجالة كبار بتحبى وطفل بيندبح على كتفى.

وخنزير كبير بيهاجمني، وخيط عنكبوت حديد مكبلني.

صرخت بأعلى صوتى... ماطلعش حسى.

قلبى ارتج في ضلوعي ... وشربت في الحلم دمعي.

خليل: ودا يتفسر بإيه؟

سراج: دا الشئ اللي محيرني.. انما يتهيألي.. الخنزير دا يعني.. يبقي فؤاد بيه الشماشرجي... رئيس المؤسسة بتاعتي.

الام : وليه كده يا ابنى الطيب احسن.

سراج : هو بکیفی یامه؟ وحلمت ان حد زارنی، وکأن مصیبه وجاتنی.. والغریبه انی..

الام: مقاطعه كفايه بقى يا بنى.. كفايه ما تفسرشى. انت احلامك بتتحقق.

سراج: ماتقوليش كده.. قولى الله اعلم يامه.

الام: يا خرابي يا مصيبتي.

خليل: مالك بس يا خالتي؟

الام: اصل فيه عربية بوليس واقفه من امبارح ورا تربتنا.. عيني بترف من ساعتها. اللهم احفظنا.

خليل: لأخير انشالله،

يسمع تق على باب المسكن

سراج: يا فتاح يا عليم ودا مين اللي جاى لنا الساعه دى؟

الام: كفايه خبط، خبطه في قلبك ياللي بتخبط. انت مين؟

مىوت : بولىس.، شرطه، افتح بسرعه.

الام: يا لهوى دى الحكومه. انشك في لساني

تفتح الباب يبخل ضابط شرطه مندفعا وخلفه عساكر

الضابط: مين فيكم يكون... سراج عبد الصبور مأمون؟

خليل: مش انا والله العظيم. انا حيالله ابن خالته، وجاى صدفه فى زيارته.

سراج: هو انا. اي خدمة يافندم؟

الضابط: معايا أمر بتفتيش المسكن.

الام: تفتش بتاع ايه. كنا سرقنا ولا نهبنا ولا قتلنا قتيل؟

الضابط: ماتضيعيش وقتى يا ستى. للعساكر انتشروا.

العساكر يبدأون في التفيش والام تتابعهم

الام: بالراحة انت وهو.

سراج: فتشوا زي ما انتوا عايزين.

هنا ما فيش غير ميتين.

دوروا مش هتلاقوا غير شرفنا .. ودا ملكنا .

وشويه كلام على كام امنيه.

وصور متبعتره..

لاحلام قديمه محبطه.

خليل: هامسا بخوف انت بتشتغل في السياسه ياسراج؟

سراج: هو فيه سياسة اصلا عثبان اشتغل بيها؟

خليل: طب هس ثم بصوت عالى تكون مدكن عندك حتة حشيش؟

سراج: هو انا لاقى أكل عشان احشش؟

خليل: يا سراج.. يابن خالتي.

سراج: ولا منور عريانه؟

سراج: استغفر الله العظيم. قصدك شريط الفيديو؟ رجعته لصاحبه.

خليل: يبقى حاجة بخصوص الشغل. اختلست؟

سراج: الا دى .. الحرام عمره ما دخل جيبي.

خليل: امال حيكون ايه يعنى؟

الام: عين وصابته يا كبدى.

سراج: حيحسدوني على ايه بس يامه؟

شرطى: تمام يا فندم. فتشنا التربه حته حته. مالقيناش ممنوعات بالمره.

سراج: احمدك يارب واشكر فضلك للضابط ارتحت سيادتك؟

الضابط: ياعسكرى، حط الحديد في ايديه.

الام: يا مصيبتي السوده.. طب ليه.؟

الضابط: هيعرف كل شئ في التحقيق.

الأم: عاجبك كده؟ اهو حلمك ابتدا يتحقق.

سراج: فال الله ولا فالك. تفي من بقك.

إظلام

المشهد الثاني

المنظر: قسم شرطه

المحقق واقف وامامه مجرم ملامحه قاسیه جالس واضعا ساقا علی ساق.

المحقق: سين. هل قمت بأرتكاب الجرائم المذكورة؟

المتهم: ينظر سارحا ولا يرد

المحقق: رد علينا واتكلم

المتهم: افندم؟

المحقق: هل قمت بأرتكاب الجرائم المذكوره؟

المتهم: مش فاكر، هو انا عقلى دفتر؟

المحقق: دا مش قتيل واحد.. دول اتنين.

المتهم: طب ماتسالهم.

المحقق: فيه شهود كلهم شافوك ساعتها.

المتهم: ولا عمرى شفتهم. دول كدابين وساعتها بالذات مكانوش موجودين

المحقق: اقعد مكانك. اشرح لى ازاى بالتفصيل.

المتهم: ماليش مزاج اتكلم.

المحقق: انت مالك مبلم؟ انت اكيد شارب خمر

المتهم: لاء وشرفك محشش.. اكدب؟

المحقق: يومك مش فايت.

المتهم: أنا مستنى المحامي بتاعي.

المحقق: انا مش تحت امرك. اعترف يا متهم احسن لك.

بليغ يدخل

بليغ: انا بليغ فصيح المفتح. حاضر عن المتهم.

المتهم: اهلا يا متر وحشتني. فين من ايام جناية الشهر اللي فات.

بليغ: انت اللي مقصر. عمرك عملت جنايه وانا اتأخرت عنك؟

المحقق: تسمح تخليه يجاوب قدامك.

بليغ: المتهم جاوب يا عجرمه ولا يهمك، انا جنبك.

المقق: سين..

بليغ: مقاطعا انا امنعك تهدده.

المحقق: انا لسه كلمته؟

بليغ : ماتكلموش بالسين. ايش فهمه معناها؟ قوله باحترام هسألك سؤال.

المحقق: حاضر. للمتهم هسأل سعادتك سؤال: قتلت ولا لأ؟

المتهم اقول الحق يا متر؟

بليغ : اياك.

المحقق: وبعدين يا متر معاك؟ مش كفايه موكلك محشش ومسطول.

بليغ: اثبت.

المحقق: هو اعترف بنفسه.

بليغ: دا اكمنه سكران وبيهلوس.

يدخل الضابط وهو يدفع سراج وخلفه خليل

الضابط: فوت قدامي.

سراج: نزل ايدك، انا لا يهمني بوليس ولا نيابه ولا باتهدد.

استمابط: للمحقق قبضنا على المتهم اياه.

المحقق: يتأمله بفضول ياه.. هو انت؟

سراج: انا مالی؟

المحقق: اصبر عليا انت التاني.

بليغ: انا الاستاذ بليغ المحامى، ضليع ورخيص مش غالى. مخالفه..

جنايه.. جنحه... أنا في الخدمه.

سراج: لا ياسيدي ما يلزمشي.. انا معملتش حاجه بالمره.

الضابط: لا مؤاخذه معرفش ان في ايدك قضيه، تحب اعرضه عليك بعد

المحقق: بالعكس انا افضل اخلص منه هو الاول.

يا عسكرى.. خد المتهم العادى دا من قدامى.

سراج: بقلق هو انا مش متهم عادى؟ ثم للمتهم انت تهمتك ايه.

لتهم: ابدا عورت خمسة وقتلت اتنين وحرقت محلين.

مىراج : بس؟

المتهم: بس مظلوم وشرفك العسكري يجره للخارج.

سراج: امال انا ایه جریمتی؟

بليغ: اسراج جالك يا حلو كلامي؟ والنبي هترجع تحتاجني وادى دقني.

المحقق: استاذ بليغ لو سمحت تتفضل بره وتستناني.

يخرج المتهم ويليغ

المحقق: اناسمحت لك تقعد؟

سراج: رجليا مش شيلاني.

المحقق: اتفضل ارتاح.. عايز حاجه تانيه.؟

سراج: يحاول أن ينطق فلا يخرج صوته.

المحقق: نعم؟ مش سامع.

خليل: بيقول عايز كوباية ميه. هااخرج اجيبهاله.

سراج: واندهلي معاك المحامي.

خلیل : حاضر .

خىليسل يىخسرج

المحقق: من فضلك تهدى اعصابك.

سراج: شوف انا هعترف بكل حاجه بس اقسم لك انى ماليش دعوه بالسياسه، وإذا كنت قولت كلمتين فارغين ع القهوه فده من باب العشم. وانتوا اللى قلتولنا اتكلموا براحتكم، ذنبى انى صدقتكم؟ ومع ذلك ادى راسكم ابوسها.

المحقق: حد جاب سيرة السياسه؟

سراج: امال ایه تهمتی؟

المحقق: هتعرف حالا للمسجل افتح محضر. بتاريخ اليوم والساعه حينه. وخد بطاقته وسجل بياناته... الاسم والسن والشهره. السكن والمهنه. الى

اخره.. واجهنا المتهم بحضوره ويسؤاله : سين امبارح كنت فين؟

سراج: امتى؟

المحقق: بالليل، ما بين الساعه عشره، لحد سبعه من صباح النهارده.

سراج: من عشره لسبعه الصبح؟.. كنت نايم بالطبع.

المحقق: انصحك تفكر قبل ما تجاوب.

سراج: احلف لك بميت يمين، صدقني.. واسألوا خليل ابن خالتي. يشهد بأنه كان نايم جنبي.

المحقق: دى نفس المعلومات اللي عندى.

سراج: الحمد لله يقف ثم بكبرياء ابقوا اتحروا كويس قبل ما تتهموا الناس الاشراف، بلاش كلام فارغ.

يظهر خليل ومعه بليغ

خليل: اتفضل يا متر احنا أسفين لك.

بليغ: يعنى عوزتنى دلوقتى؟

سراج: مين المغفل اللي قالك كده؟ ما فيش قضيه من اصله. اتكل على الله.

بليغ: وهو يخرج طيب بس لو احتجتني، اتعابي اربع بواكي.

سراج: يالا بينا نروح ياخليل.

المحقق: تروح فين؟ لسه بدرى.

سراج: بالعقل كده، مدام كنت نايم ساعة الحادثه.. ابقى برئ من اى شبهه.

المحقق: ضاحكا وانت عرفت ايه الواقعه؟

سراج : لأه.

المحقق: أمال بتتكلم على اى اساس؟

خليل: اه صحيح يا سراج.

سراج: بعصبيه أنا اللي بدى أعرفه ايه هي التهمه؟

المحقق: انت متهم بارتكاب عدة جرائم ضخمه.. وذلك في الفتره ما بين الساعه عشره ولحد سبعه وخمسه.

سراج : عدة جرائم مره واحدة؟ اما والله العظيم دى نكته.

خليل: ونكته سمجه وبايخه.

المحقق: اهدا بالله يا حضرت.

سراج: قولى انت بالذمة .. واحد نايم يرتكب ازاى اى فعله؟

المحقق: تنكر انك اثناء نومك حلمت؟

سراج: لأطبعا ماانكرش.

المحقق: صارخا للكاتب بانتصار سجل عندك بسرعه.. بمواجهة المذكور اعترف بالتهمة.

سراج: نعم؟ دا شغل مانخوليا.

المحقق: ما تتكلمش من غير ما يتوجه لك سؤال.. ولاحظ إن أى كلام تقوله.. ممكن يتحسب ضدك... لو لك اى طلبات قانونيه.. احنا تحت امرك. وانصحك شخصيا تستعين بمحامى... يقف فى صفك، وينبهك لحقك.

خليل: انده لك المتر تاني؟

سراج: استنى يا خليل ثم للمحقق سيادتك اكيد بتهزر.. بتضحك.

المحقق: أنا لا أسمح لك... أنا سألتك وأنت أعترفت بنفسك.

خليل: بقلق هامسا انت حلمت ايه بالظبط؟

سراج: مفيش غير اللي قولتهواك، ثم انت بتوطى صوبك ليه، هو الحلم تهمه؟

خليل: لأ طبعا ولا حد يستجرى يقولها؟

سراج: ولا فيه حد في الدنيا دي ما بيطمش؟

خليل: على رأيك.

سراج : قوله يا خليل ... انت مذر ما بتحلمشي؟

خليل: بتردد وقد فوجئ انا؟ لأ

سراج: لأ دا ايه انت راخر؟

المعقق: ماتتفلسفش، جاوب بسرعه، حلمت ام لا؟

سراج: لا حول الله. حلمت اه. حد شريكي؟

المحقق: سين. إيه هي قصة الحلم اللي شفته بالتفصيل؟

سراج: بالتفصيل كمان؟ دا كلام جنان.. هو فيلم ولا مسرحيه؟ المحقق: رد طوالي.

سراج: محدش له حق يسالني عن احلامي.. بمقتضى اي قانون في الدنيا دي، بتفتشوا جوه دماغي؟

المحقق: بمقتضى قانون الكخا وقانون قلة القيمة والجرسه الاجتماعيه رقم ٣١٧ لسنه ١٩٩٩.

سراج: مستحيل فيه قوانين بالأسامى ديا والا كنا قرينا فى الجرايد عنها.

المحقق: اتنشرت بالفعل في جريدة الوقائع الرسمية.

سراج: عمرى ما اشتريتها. بتتباع في السوق الجريده دي؟

المحقق: الجهل بالقانون لا يعفى من المسئولية.

خليل: بقلق انت حلمت ايه بالظبط؟

سراج: ما فيش غير اللي قولتهولك.

المحقق: سين مرة أخرى.. ما هو تفاصيل حلمك بالكامل؟

سراج: انا ارفض اجاوب.

المحقق: انت حر لكن هترجع تندم... وفي المحكمة نتقابل.

سراج: محكمة ايه بقى ان شاء الله؟

المحقق: محكمة امن النفس العليا طوارئ.

سراج: انتوا كمان عملتوا محكمة للنفس؟

المحقق: طبعا لأن النفس أماره بالسوء.

خلیل: ودی فیها قضاه بجد؟

المحقق: دى محكمة خاصه. القضاء بتوعها دكاتره في الاجتماع وعلم النفس.

مسراج: ما كل الناس بتحلم اشمعنى انا اللي بتحاكموني؟

المحقق: مافيش عقوبه على الاحلام البريئه، القانون منصب على الاحلام المحقق الخطيره. احسن لك تعترف حلمت بأيه.

خلیل: اسمح لی یافندم امشی.

المحقق: استنى. انت مطلوب شهادتك.

خليل: وانا مالى هو اللي حلم بخوف وهو يرتجف اتكلم يا سراج ما تخافشي.

سراج: حلم بسيط وعادى. حلمت انى في شغلى وبأدى واجبى.

المحقق: والله؟ خش في عبى! سين.. هل لك شركاء في الطم؟

سراج: يعنى إيه؟ هو حد يقدر يحلم معايا؟

المحقق: جاوب من غير مراوغه، شفت مين في الحلم؟

خليل: هامسا لسراج انت ماشوفتنيش.

سراج: شفت ناس كتير.

المحقق: هما مين؟ واتقابلتوا فين؟ وعملتوا ايه؟

سراج: اما غريبه، واحد بيطم لنفسه.. التاني زعلان ليه؟

المحقق: ما حصلش أنك غيرت اللوايح والقوانين في المؤسسه بتاعتك؟

سراج: فعلا لكن..

المحقق: مقاطعا ما حصلش انك اعتديت على رئيس مجلس ادارتك؟

خليل: الحق دول شافوا الحلم معاك.

الضابط وخدتوا بالكويا فندم من الحته بتاعته هو وخطيبته؟!

المحقق: الانسه حنان؟ طبعا عارفين كل شي بالتفصيل.

سراج: حصل لكن في الطم مش في الحقيقه.

المحقق: واحنا هنستني عليك لما تحققه؟ من اجل هذا صدر القانون.

سراج: انا ماكنتش اعرف بذهول لكن مين اللي قال لكم؟ عرفتوا ازاي؟

المحقق: منتصرا عين العدالة ساهره لا تنام. عندك اقوال تانيه؟

سراج: ايوه.. انا عايز محامي.

بليغ: يدخل في الحال ايدك على عشر بواكي.

اظـــــلام

المشهد الثالث

المنظر : حبس النيابه

المتهم: ظهر الحق.

بليغ: الف مبروك يا عجرمه.

المثمور: انا مستغرب. جبت له براءه ازای؟

المتهم: دا سر المهنة يا حضرة هامسا لو وقعت في صبيقه اطلبني انا اتعابي مش كبيره.

المأمور: انت بتهزر معايا؟ للمتهم تعال امضى في الدفتر خلينا نخلص منك.

بليغ: فين الاتعاب يا عجرمه؟

المتهم: اصبر عليا شويه يا متر

بليغ: انا جبت اك براءه وصدر الحكم واديك بتنفذ.

المتهم: هما يومين، اخبط فيهم عمليه نضيفه واعكمك الخمس بواكي.

بليغ: هي عمليه کبيره؟

المتهم: فيها قول ميت الف.

بليغ: يبقى لى فيهم عشرين الميه.

المتهم: ماشى كلامك.

المامور: انتوا بتتفقوا قدامي .. عيني عينك؟

بليغ: تقدر تثبت الكلام دا في المحكمه؟

المنمور: وانا فاضى لك؟ خد المتهم بتاعك وغور طوالى.

بليغ: وموكلي التاني اللي عنده اذن للزياره؟

المأمور: بعت اجيبه هنا، دا متهم غير عادى، يا عكسرى دخل المتهم اللي عندك.

يدخل سراج مكبلا بالاغلال

المتهم: شد حيلك يا زمل. مايلزمش أي حاجة من بره؟

سراج: هما أفرجوا عنك؟

المتهم: خدت براءة لعدم كفاية الادلة. عقبال عندك.

بليغ: اطمن هيحصل وشرفك. بالمق عندك زيارة.. الجو بتاعك حبيبتك جايه

تقابلك.

سراج: حنان هنا؟

بليغ: مستنيه بره هي وابن خالتك.

سراج: القابلها هي الاول. للمأمور ولو سمحت يا فندم تسيبني اختلى بيها شويه؟

المأمور: نعم يا حبيبي؟

بليغ: ومن فضلك.. تفك الحديد من ايده بالمره.

للمور: كمان؟ طب خمس بقايق مش اكتر.

بليغ : هوصل الزميل لحد بره اخلص له بقيه الاجراءات. وارجع لك.

يخرج الثلاثه ثم تدخل حنان

حنان : سراج..

سراج: حنان.

يتعانقان

حنان : باکیه یا حبیبی.

سراج: يا حبيبتي.

حنان : یا روحی..

سراج: يا عقلى يا قلبى .. وحشتينى .. وحشتينى .

حنان: انت اكتر.. اكتر.

سراج: طول الوقت كنت بكفر فيكي.

حنان: بتفكر بس؟ يعنى ما حلمتش بيا؟

سراج: طبعا يا حبى، هو انا بطم الا بيكي انتى؟

حنان: يا مصيبتي السوده يا فضيحتي.. يا فضيحتي.

سراج: طب اهدی.. اهدی.

حنان: ليه كده يا سراج؟ ليه تحلم بيا، انا عملت لك ايه؟

سراج: دا حلم يا حنان. مجرد حلم.. خيال في خيال، انتي اتجننتي؟

حنان: يعنى لو كان لك اخت ترضى ان حد يطم بيها؟

سراج: ودي فيها ايه؟

حنان: ولما تيجى سيرتى في المحكمه وتحكى الحلم للناس كلها؟ اودى وشي فين من عيلتى؟ والناس تقول ايه على سمعتى؟

سراج: واشمعنى عبد الحليم غنى بحلم بيك ومحدش كلمه؟ ثم شاب في سنى وبيحب خطيبته. ما يحلمشى؟

حنان: كنت اصبر لحد ما تتجوزني.

سراج: ما احنا بقالنا سبع سنين مخطوبين، احلم فيهم بأيه ولا بمين؟

حنان: بأي واحده غيري. م البنات كتيريا أخي، وكلهم حلوين.

يبخل بليغ

سراج: والله؟ اشمعني دلوقتي؟ دا انتي بتغيري عليا م الهوا.

حنان : غيرت رأيي.. ومسامحاك من قلبي.

بليغ: ابسط يا عم مين قدك! ادتك الاذن تلعب بديلك رسمي.

سراح: وهو بجد؟ دا ف الحلم بسي.

حنان: وانت عايز تلعب بديلك بجد؟ دا انا افقع لك عينيك الاتنين.

سراج: يعنى مش كفايه عليا النيابة جايه انتى كمان تحاسبيني ع الحلم؟

حنان: وتحلم ليه من أصله؟ مشتنى ف شوراع ضلمه وما اتكلمتش. خدتنى السينما وما ادتنيش فرصه اتفرج وسكت، بتنط لى ف البيت لما بيبقى اهلى بره وماقولتش لحد. قلت لى ماتخافيش انا اعرف دكتور كويس وصدقتك، عايز ايه تانى؟

سراج: انا برضه؟ طب انا اعرف اهلك بيخرجوا امتى منين؟

بليغ: احنا ف ايه ولا ايه دلوقتي؟

حنان: اعمل معروف، ابوس ايدك استر عليا وما تجيبش سيرتى معاك في الطم.

بليغ: ما خلاص. حكى لهم الحلم والاعتراف سيد الأدله.

سراج: بس انا ماحكيتش الطم.

بليغ: متأكد؟

سراج: ايوه، لما سألوني اعترفت اني حلمت بس ما قولتش بأيه.

بليغ: هايل يبقى كل اللي عليك تنكر انك حلمت بأي حاجه بطاله.. دوغرى تطلع براءه.

حنان: ايوه انكريا سراج.. انكر انك حلمت بيا.

سراج: وهو حبنا بقى تهمه بطاله؟ ثم لبليغ انا كنت فاكرك هندافع عن حقى فى الحلم كنت فاكرك هنطعن فى قانونية الاتهام نفسه.

بليغ: واطعن في القانون واتفلسف ليه، اذا كان الاسهل اتحايل عليه؟

سراج: بس كده هبقى وافقت ان الحلم جريمه

بليغ: يا سيدى جريمة ولا مش جريمة. انت هتغير الكون؟. انت مالك، خليك ف حالك.

سراج: المنطق والعدل ما يقولش ان حد يفتش جوه دماغي..

بليغ: احنا مش في ده الساعه دي، المحاكم مالهاش دعوه بالمنطق ولا بالعداله. المحاكم ما فيهاش غير مكسب وخساره. واللي يلعب احسن هو اللي يكسب الجوله.

حنان: اسمع كلام المتريا سراج.

سراج: وهو لازم يسمعني مدام هيدافع عني.

بليغ: شاخطا بعصبيه مش انت اللي هتعلمني شغلي، انت تدفع الاتعاب وتقعد ساكت.

حنان: ايوه اسكت خالص وما تجيبش سيرتى.

سراج: ما تتأمرش عليا قوى. المؤسسه بتاعتى ممكن تقوم لى محامى.

بليغ: كده؟ يبقى البس القضيه بالشفا يتحرك خارجا.

سراج: مع الف سلامه انا ما اتهددشي.

حنان: استنى يا متر. يا سراج.. اسمعنى عشان خاطرى.

سراج: ابدا. المؤسسه بتاعتي ملزمه تجيب لي محامي وكمان مجاني.

حنان: افهم. رئيس المؤسسه هو اللي حرك الاتهام ضدك.

سراج: بذهول فؤاد بيه الشماشرجي؟

بليغ: ايوه يا فالح. ابقوا خلوا القطاع العام بتاعكم ينفعكم.

حنان: تمسك به ارجوك. دا طايش ما تاخدش على كلامه.

سراج: انا اسف يا متر. حمار وغلط وحقك عليا.

بليغ : كل دا عشان مستخسرين فيا عشره اتناشر باكو؟ مابتصرفوا يمين وشمال، جت بس على اتعاب المحامين؟

حنان: شوف شغلك واطلب ما بدالك .. احنا جاهزين.

سراج: نعم ياختى؟ وهجيب له منين؟

حنان: تدبر، أن شالله أبيع اللي حيلتي مستدركه بس أنت متجيب سيرتي؟

بليغ : انتى مسكنى ف الكلمه دى وعلقنى؟ تسمحى تستنى انتى. لسراج قولى تفتكر ايه الدافم اللي خلا رئيس المؤسسه يبلغ عنك؟

سراج: معرفشی.. بس انا حلمت له کام حلم م اللی هما. والظاهر انه اتشاءم منی، لانه بعد کل حلم کان بیخصم لی.

بليغ: وليه تحكيله مدام احلام منيله؟

سراج: مش انا. انا ما حكيتش غير لبعض زمايلي اللي بثق فيهم.

حنان: اكيد حد فيهم وصله.

بليغ: استنى احنا نسينا حاجه مهمه، لما انت ماحكيتش الحلم الاخراني ف النيابه، امال عرفوا ازاى تفاصيله بمنتهى الدقة؟

سراج: اهو دا اللي محيرني

حنان: أنت متأكد أنك ماحكيتوش لحد؟

سراج: هو انا لحقت؟ ما فيش غير خليل ابن خالتي.

بليغ: بس. يبقى هو اللي اعترف عليك يا حلو.

سراج: مش ممكن دا زي اخويا بالظبط.

بليغ: انت اللي طيب. مش مفروض تحكي احلامك لأي حد. حتى لو اخوك بجد.

سراج: لا .. لا خليل جدع وابن بلد ومستحيل يخوني.

حنان: يمكن ضغطوا عليه وعذبوه... لحد ما اعترف وجاب سيرتى.

سراج: ع العموم هو خواف شويه.

بليغ: شفت؟ يبقى هو.

سراج: اخص عليك يا خليل اخص.

يبخل خليل

خليل: الف سلامه عليك يا صاحبي. الهي ربنا يفك ضيقتك.

سراج: جيت في وقتك عشان تستلقي وعدك مني.

خليل: الله؟.. حصل ايه؟

سراج: دفعولك كام عشان تبيعنى؟ انطق... اتكلم.

خليل: هما بيدفعوا؟ والله ما حد قالي.

حنان: مش حرام عليك تفتن للبوليس بالحلم اللي حلمه سراج؟

خليل: انا؟ ينقطع لساني لوكان دا حصل. احلف لك بأيه؟ طب وحياة امك..

مستدركا قصدي خالتي، اني ما شهدت بكلمه ضدك.

بليغ : هايل.. يعنى مستعد تشهد قدام المحكمه في صفه؟

خليل: طبعا. بس اذا حلفوني في المحكمه حلم بأيه هضطر اقول بالملي.

سراج: اه یا ندل یا خسیس یا جبان، مش قادر تشهد زور علشانی؟

خليل: يا سراج يا ابن خالتي...

سراج: اخرس يا خاين يا منافق. غور من وشي اطلع بره بيتي.

خليل: هو سجن النيابة بقى بيتك؟ طب اديك فوات على نفسك.

يغرج خليل

سراج: اعمل ايه بس يا ربي.

بليغ: طظ ولا يهمك، حتى او شهد ضدك ممكن نشكك في شهادته.

حنان: ایوه نقول مثلا انه کان عایز یتجوزنی عشان کده انغاظ منی وجاب

سیرتی.

بليغ : او نقول انه مثلا حشاش ومسطول على طول.

سراج: المحكمه مش هناخد بكلامنا.

بليغ : بسيطه نحط له في جيبه حتة حشيش زي دي ويخرج من جيبه قطعة مخدرات

سراج: لاء بلاش حرام.... دى تسوى لها الشئ الفلاني.

بليغ : عموما، اطمن، موقفك القانوني متين لأن مافيش دليل مادي انت حلمت بأيه.

حنان: یعنی انت مطمن یا متر؟

بليغ: طبعا. المهم نقولهم انك حلمت حلم تاني، يكون برئ ولطيف مثالي.

سراج: إزاى يعنى؟

حنان: مثلا تقول انك كنت ماشى فى شوارع كلها ورد وجناين.

سراج: ماشى رايح فين؟

بليغ: كنت في طريقك للعمل؟ حتى وانت نايم بتحلم بالعمل.

سراج: ويعدين؟

بليغ: هو احنا هنألف لك؟ كمل انت بقى من عندك.

سراج: فضلت ماشي في حالي.. بفكر.

بليغ: ماتفكرش.

سراج: فضلت ماشي في حالي.، بغني.

بليغ: برضه ما احبذشي.

سراج: فضلت ماشى ولا شئ على بالى.

بليغ : هايل.. جميل.

سراج: مريت على شلة بنات وينين.

بليغ: يقاطعه فورا بلاش بنات بالمره.

حنان: احسن برضه ليفتكروها انا.

سراج: فضلت ماشى فى شارع هادى وفاضى وبعدين حودت شمال.

بليغ: ليه ما كنا ماشين حلوين؟

سراج: خلاص حودت يمين

بليغ: لا تمشى يمين ولا تمشى شمال

سراج: امشى ازاى امال؟

بليغ: دوغرى دوغرى دوغرى، ولا تتلفتشى، ولا حتى تبص وراك.

سراج: فضلت ماشي دوغري لحد ما وقعت في حفره وانكسرت رجلي.

بليغ: لأه لأه ايه اللي جرالك. ما تطلق خيالك. تقول مثلا.. إنك اشتريت لرئيس

المؤسسه زهور وتورته.

حنان: فكره هايله.

سراج: زهور وتورته مره واحده؟ وايه المناسيه؟

حنان: وانت هندفع حاجه من جيبك؟

سراج: اه صحيح. واحلم بأيه غير كده؟

بليغ: ان الشوراع نضيفه.

بليغ: الاسعار رخيصه...

حنان: الناس سعيده.

بليغ: التليفزيون برامجه ممتعه

حنان: الشمس طالعه مشرقه.

بليغ: البوليس معاملته كويسه. وهكذا والى اخره.

سراج: حاضر .. حاضر، وهو كذلك.

بليغ: نقول م الاول تاني عشان تفتكر.

سراج: اشتريت للمدير زهور وتورته؟

بليغ : ايوه.

سراج: وانوني علاوه رفضتها.

بليغ: اهو كده. اهو كده..

سراج: الشوراع نضيفه زي الرخام.

بليغ: تمام.. تمام..

سراج: كل الفوانيس منوره. التليفزيون برامجه ممتعه. والشمس طالعه مشرقه. وخواجه من بلاد الفرنجه.. ماشي يقر ويحسدنا.

بليغ: الله.. قول كمان.

سراج: الاسعار رخيصه.. الناس سعيده ما فيش زحام.. مافيش كلام.. ولا فيش كده.. حاجه ابهه.

بليغ: اهو كده.. اهو كده.

سراج: بوليس تمام.. تعظيم سلام.

بليغ: احفظ الحلم دا بالظبط، لا تزود حرف.. ولا تنقص حرف. اضمن ال القضيه.. م الجلسه الاولانيه

حنان: قول يارب.

سراج: يارب.

اظـــــلام

المشهد الرابع

المنظر: قاعه محكمه

منصة القضاء في الوسط اميل الى يسار المتفرج ومنصة النيابه الى طرف. قفص المتهم اقرب الى المتفرج ومقاعد المتفرجين هي نفسها صاله المحكمه. نرى حاجب المحكمه والكاتب ووكيل النيابه أم تظهر الام معمدا خارا.

ثم تظهر الام ومعها خليل

الام: منك لله ياللي كنت السبب.

خليل: والله ما هو انا يا خالتي. ليه محدش عايز يصدقني؟

الام: امال مين هيكون وزعليه يعنى؟

خليل: وإنا ايش عرفني؟ اصبري يمكن المستخبى يبان دلوقتي.

الام: ربنا معاك يا سراج يا بني، ربناع الظالم.

يطسهسر الاب

خليل: دا والد حنان اهو.

الام: اهلا يا حاج.

الاب: اهلا بيكي يا ست ام سراج . قلبي عندك.

الام: اوعى تكون صدقت حاجه على ابنى. دى تهمه زور واتلفقت له.

الآب: انا صحَيح معرفش سراج كويس، انما اللي ما لى ايدى ومتأكد منه اخلاق حنان بنتي.

خليل: وهي حنان ما لها بالقضية؟

الاب : حنان لا يمكن تسمح له يحلم بيها بشكل غير مقبول.

خليل: اه.. هي رجهة نظر برضه.

الاب: انا شايف الاحسن نلم الموضوع ونجوزهم بأسرع ما يمكن.

الام: ان شاء الله اول ما تظهر براءته نبقى نفكر.

الاب: انا ما كنتش موافق يتجوزوا ويعيشوا معاكى فى تربه، لكن اذا كنت انتى مصره..

الام: انا ما عدتش مصره على حاجه. واسكت دلوقتي ما تقاطعشي.

تحدل حنان

حنان: عربية الحبس وصلت ونزل منها سراج.

الاب: انتى واثقة يا حنان انه ما حلمش بيكي كده ولا كده؟

حنان: اطمن يابابا، المحامي اكد لي اني بره الحاكيه وان شاء الله تفتخر بيا.

الاب: ع لله يا بنتي.

متحقى يصور بكاميرا

مصور: ابتسمى من فضلك عشان الصوره.

حنان: وهي تداري وجهها لو سمحت مش عايزه، ارجوك

مصور: دى قضية رأى عام وتهم القراء.

الاب: مدام واثقة من نفسك ما تخافيش من حاجه. انتى ما عملتيش جريمه ارفعى راسك يا بنتى ولا يهمك. صور يا استاذ احنا ناس اشراف ما يهمناش.

حنان: ترفع اصابعها بعلامة النصر

الام: وإنا رخره القط لي تصويره، إنا أمه يا فندي.

خليل: وإنا ابن خالته.

يدخل بليغ والمتهم في ملابس فاخره يدخل سراج في حراسه الى القفص

الام: ربنا معاك يا سراج، شد حيلك يا عين امك.

سراج: الشده ع لله يامه.

حنان: تقترب من قفص الاتهام ما يهمكش حاجه يا سراج.

سراج: انتى اللي تهميني يا حنان. طمنيني، لسه بتحبيني؟

حنان: اطمن انا هفضل وراك طول عمرى، اواجه بيك الدنيا، معاك على الحلوه والمره.

سراج: يا حبيبتي يمسك يدها من خلال القفص.

حنان: سيب ايدى، الصحافه بتصورنا.

المتهم: ولا يهمك يا زمل. السجن للجدعان وياما في الحبس مظاليم.

يدخل مخلص المحامي

مخلص: انا جيت لك ما تحملش أي هم.

سراج: اشكرك يا متر، اقدم لك الاستاذ بليغ المحامى اللى وكلته. ثم لبليغ أعرفك بالاستاذ مخلص ابو زيد الهلالي.

مخلص : مصححا ابو زيد الفدائي.. محامي ابتدائي وعالى وعضو منظمة حقوق الانسان.

بليغ: تشرفنا

مخلص: ومتطوع للدفاع عن حضرته مجانى. دا بعد اذنك يعنى

بليغ: انت حر.. انا مالي.

سراج: بيقولك متطوع مجانى، خدت بالك م الحته دى؟

بليغ: وانت كمان حر، وبكره تشوف اللي هيجرالك.

سراج: دا حقد بين الزملا.. عادي.

مخلص: انت ايه رأيك ف القضيه؟

بايغ: هنكسبها من اول جلسه طبعا وانت؟

. خلص: رأيى ان القضيه واضحه زي الشمس، ومؤكد هنخسرها.

سراج: ايه؟ امال انت متطوع ليه؟

مخلص: احنا بنترافع للتاريخ والمبدأ وللانسانية، لأننا لابد نؤازر شهداء الحريه.

سراج: شهداء الحرية؟ وانا لسه اتحكم عليا؟

مخلص : ما تستعجلش، رایح فی داهیه یعنی رایح فی داهیه ویمکن بعد الجلسه دیه،

بليغ: جالك كلامي؟ الرخيص دايما يكلفك غالى.

مخلص: عيب يا متر تستغل موكلك، مش هيبق موت وخراب ديار.

بليغ: عيب عليك انت تقطع عليا وتبوظ لنا المهنه.

سراج: انت هنتخانقوا من اولها؟

الحاجب: محكمه..

يدخل القضاء لهم رؤوس صلعاء وينظارات سوداء

(محكمة امن النفس العليا طوارئ المشكلة من الدكتور فلان الفلاني استاذ علم النفس والدكتور علان العلاني استاذ علم الاجتماع والدكتور ترتان الترتاني مفسر الأحلام.

القاضى: النيابه.

النيابه: انه بتاريخ ١٩٩٩/٢/١٣ اقدم المتهم المذكور على تعاطى احلام خطره وضاره بأمن المجتمع. فتعدى في حلمه على رؤسائه وخالف القوانين المعمول بها في عمله كما ارتكب الفعل الفاضح العلني مع خطيبته، وذلك على النحو المبين بعريضه الدعوى وهوالامر المؤثم بمقتضى قانون قلة القيمة وقانون الكخا والرزاله والجرسه الاجتماعيه.

القاضى: المتهم مذنب ام غير مذنب؟

سراج: لأغير مذنب

القاضى: وكلت حدد للدفاع عنك؟

بليغ: بليغ فصيح المفتح حاضر عن المتهم.

مخلص: مخلص ابو زيد الفدائي حاضر عن المتهم.

القاضى: اذا كان للدفاع طلبات يتفضل.

مخلص: ادفع ببطلان تشكيل هيئة المحكمه.

سراج: حرام عليك انت اللي هتوديني في داهيه

بليغ: مانا قلت لك، ابو بلاش خاف منه

القاضى: استاذ مخلص.. اتكلم، لك مطلق الحريه

مخلص: فتشكيل المحكمه خالف الدستور والقانون الذي يعطى لكل شخص الحق في أن يحاكم أمام قاضيه الطبيعي.

القاضى: المحكمه ترفض كل طلبات سيادته. فالقاضى الطبيعى للحاكم يكون من علماء النفس وعلماء الاجتماع وعلماء تفسير الاحلام والمحكمه مشكله على هذا النحو فعلا.

سراج: اه فهمت، تسيبونا نتكلم على مزاجنا وانتوا تحكموا على مزاجكم.

القاضى: عندك طلبات تانيه؟.

مخلص: لحظه لما المكر.، ايوه احنا اتعرضنا للتعذيب يا سيادة الرئيس.

سراج: بدهشه اتعرضنا؟ ويعذوبك انت ليه؟

مخلص: انا بتكلم بلسانك للمحكمه نعم تعرض موكلى لعذاب شديد وأطلب توقيع الكشف عليه.

سراج: بدهشة انا قلت لك انى اتعذبت؟

بليغ : هيوديك في ستين داهيه.

القامين : حصل الكلام دا يا سراج ؟

سراج: لا يافندم ما حصلش، محدش عذبني.

مخلص : بل حصل.

سراج: عجايب. انت هتعرف اكتر مني؟

مخلص: ايوه اعرف اكتر منك، انا المحامي.

سراج: والله العظيم ما اتعذبت.

مخلص: انت بس ناسى للمحكمه المتهم من هول التعذيب فقد الذاكره. او هو يخجل من الاعتراف بذلك لأن التعذيب شمل اجزاء حساسه من جسمه.

القامي : يوقع الكشف الطبي على المتهم.

سراج: یادی الفضایح. مش عایز حد یکشف علیا لمخلص انت هتشوه سمعتی من اولها؟

مخلص: التعذيب لا يشترط ان يكون مادياً والتعذيب المعنوى اقوى.

القاضى: الأستاذ بليغ له طلبات؟

بليغ : نعم.

القاضى : اتفضل.

بليغ: اسمحولي أن اشيد بنزاهة المحكمه وثقتنا في عدالتها المطلقة.

سراج: انت بتقول ایه یااستاذ انت راخر؟

بليغ: كما اشكر رجال الامن على حسن معاملتهم للمتهم اثناء التحقيق.

مخلص: المحامى دا متأجر ضدك عشان يخسرك القضيه.

سراج: الله يخرب بيوتكم انتو الاتنين.

القاميي : النيابه تتفضل

النيابه: حضرات القضاه.. حضرات المستشارين.. تولد الجريمه في العقل. فالعقل هو المحرض الاول على ارتكاب الشر. والحلم رغبه مكبوته في النفس الاماره بالسوء، تعبر عن نفسها في شكل حلم ولكن ما يلبث المرء وقد طفت رغبته الدفينه الى سطح عقله الواعي ان يعمل على تحقيقها ان عاجلا او اجلا ومن هنا كانت حكمة المشرع في مصادرة الحلم ومنعه كاجراء وقائي. لان الوقايه خير من العلاج ومصادرة حلم فاسد منحرف اجدى من انزال العقاب بعد ان يكون الفعل قد وقع بالفعل.

مخلص: الدستور يكفل حرية الفكر والتعبير ولا يعاقب على فكر او نيه.

النيابه: نعم ولكن الدستور لا يكفل حرية الاحلام ولو اراد واضعو الدستور ان يكفلوا حرية الاحلام لسجلوها، ثم حرية الاحلام مكفولة للجميع شريطة الا تتعارض مع قيم المجتمع، ومن ناحية اخرى فالحالم غالبا ـ كما في قضيتنا هذه يروى حلمه للاخرين وبالتالي يحرضهم على التفكير بنفس الطريقه وبهذا ينتشر في المجتمع الاحلام الفاسده الاجراميه والنيابه تطالب بتوقيع عقوبة ايداع المتهم مستشفى الاحلام العصبيه لمدة عشر سنوات مع غسل مخه من الأحلام.

القاضى: فيه طلبات تانيه؟

النيابه: ايوه احنا طلبنا استدعاء الشهود اللي حلم بيهم المتهم، وهم السيد فؤاد الشماشرجي رئيس مجلس ادارة المؤسسه العامه والاستاذ خليل صديق والانسه حنان خطيبة المتهم.

حنان: طب وانا مالي .؟

القاميي: الدفاع.

بليغ: نحن ننفى التهمه نفيا باتا.

مخلص: نحن لا ننكر الحلم بل ونحتفظ بحقنا في الحلم وقت ما نشاء ويأى كيفية نشاء.

بيلع: هو عند وخلاص يا ابو زيد؟

مخلص: انت اللي بتكابر.

النيابه: تسمح لنا بسؤال الحالم؟

القامْس : اتفضىل.

النيابه: تنكر يا متهم، انك حلمت؟

سراج: حلمت ربحلم. ما انكرش، ومين فينا ما بيحلمش؟

بليغ: حقا أن موكلي قد حلم لكنه غير الذي لفقته الشرطه ضده واطلب من عدالتكم سؤال المتهم فهو أدرى الناس بحلمه.

النيابه: يعنى ايه؟ ما اعتدتش على رئيس المؤسسه بتاعتك؟

سراج: مبتسما محصلش.

النيابه: ما خالفتش اللوايح والقوانين في شغلك؟

ِ **سراج** : محلصش.

النيابه: ما اقمتش علاقه غير شرعيه وعلنا مع خطيبتك؟

سراج: محصلش لسه.

القاضى: احكى لنا يا سراج امال حلمت بأيه؟

سراج: حلمت انى ماشى .. ماشى ف حالى .. ولا شى على بالى فضلت ماشى دوغروى دوغرى .. واخد فى وشى .. ما بتلفتشى ما شفتش حد غير الزهور والورد كل الفوانيس منوره .. كل الاشجار مزهره وخواجه من بلاد الفرنجه .. ماشى يقر ويحسدنا .

بليغ: يا سيدي قول كمان..

سراج: الاسعار رخيصه.. الناس سعيده.. ما فيش زحام... مافيش كلام

ولا فيش كده حاجه ابهه... التليفزيون برامجه ممتعه والشمس طالعه مشرقه. في عز الزمهرير والشتا.. شوراع نضيفه زي الرخام. بوليس تمام.. امن وامان تعظيم سلام.

حنان: تقف وتصفر وتصفق برافو.. أعد.

سراج: يعيد اخر فقره من شهادته

النيابه أيا سلام. يا سلام، بقى كده؟ الكلام دا على انا؟ ياسيادة الرئيس.. المتهم يكذب ويختلق حلما لم يحدث ولا دليل عليه.

بليغ : نحن الذين نطلب من النيابه دليلا على ما تتهمنا به، فالبينه على من ادعى.

الام: تزغرد الله اكبر.. يحيا العدل.

النيابه: الدليل موجود فتحت يدنا شريط فيديو مسجل لطم المتهم بالصوره (تحدث ضجه وهمهمات في القاعه).

القاضى: يطرق المنصبه نرجو الهدوء في القاعه

النيابه: ارى دهشة فوق الوجوه ولكن يزول العجب اذا عرفنا ان التكنولوجيا استطاعت ان تخترع جهازا حديثاً يلتقط عن بعد اشارات المخ الصادره من الانسان ثم يترجمها بواسطة الكومبيوتر الى صوره واضحه، وقد استوردنا الجهاز وتم تثبيته في سياره قرب مسكن المتهم وسجل الحلم بالكامل.

مخلص: انا اشجب واعترض هذا الاجراء فهو ضد حقوق الانسان. انا منسحب احتجاجا.

النيابه: نطلب الأذن بعرض شريط الحلم عليكم.

القاضى: المحكمه تأذن.

حنان: يا فضيحتي.. يا فضيحتي.

المشهد الخامس

المنظر: مكون من مستويين افقيين: الاقرب للمتفرج يوحى بغرف الموظفين في المؤسسه العامه ولها حوائط منخفضه من الزجاج الشفاف.

مكاتب لسنة موظفين ثلاثة للرجال لليمين وثلاثة للموظفات لليسار المستوى الثانى في الخلف الى اعلى يمثل حجرة رئيس مجلس الاداره وبها مكتب وخزينه ضخمه.

لافتات معلقه كتب عليها: المصنع - الاداره - المخازن - التوزيع الخ المنظر ومحتوياته غير واقعيه بالطبع وان كانت موحيه.

بدایة الحلم من خلال ستار شفاف له اطار کننه شاشة عرض ونری اولاد ذبذبات کما فی شریط الفیدیو.

الموظفون: جالسون جامدون كالتماثيل بأقنعة متشابهه وزى موحد بدله وكرافته.

فؤاد : يظهر في مكتبه ويتحدث في ميكروفون كبير بصوت مزعج ولانتبين ما يقوله

الموظفون: يبدأون العمل كأنهم ريبوت أو عرائس وعندما يتحركون يمشون ببطء ونرى في في ظهر كل منهم زمبلك كبير.

مناعى: يدخل من ناحية بصناديق شحن كتب عليها «جهل خام» يسلمها لوظف فيسلمها لاخر وهكذا حتى باب المصنع حيث تختفى تخرج الصناديق من باب التوزيع مزوقة كتب عليها «جهل مصنع او مركب»

الموظفون: يبدو عليهم التعب الشديد.

سراج: يدخل ويفتح احد الصناديق فتخرج منه يد وتصفعه

سراج: يدخل في ملابس مايسترو يمسك بعصا ويدق بها على مكتب

الكل: يسكت وينتبه

سراج: يحرك العصا فنسمع موسيقي تبدأ خافته

الموظفون: ينظرون حولهم لحظة ثم يمسكون بالصناديق ويلقون بها حاله من الفوضى.

سراج: يشير بالعصا فيظهر زرع وزهور في كل مكان

الموظفون: يعملون على الموسيقى وهم يغنون خلفه ويرقبصون باليه وتعبيرى ثم بلدى ربما يتلقون دروسا اثناء العمل لتطويره، على سيوره. ويفتحون كتبا.

سراج: يأخذ من خزينة المؤسسه ويفرق عليهم نقودا

الزميل: يخرج من الخزينه في هيئة لص تقليدي حاملا النقود

سراج: يعهد الى المدير بوظيفة الكنس لأنه وسنخ المؤسسه

الموظفون: يخلعون ملابسهم فنجدهم بشورت وفائله او تريننج يتسابقون في إتقان العمل وسرعته كأنها مباراه

سراج: يصل قبل الرجال

حنان: تصل قبل الفتيات

صوت : المؤسسه تفوز بكأس الانتاج، مبروك، الجميع يهنئانهما ويأخذان الكأس ويشربانه ويسكران

حنان: ترقص وتغنى بجرأة بعكس شخصيتها فنى الواقع الاثنان يرقصان معا والكل يصفق

سراج وحنان: نراهما بجناحی طائر او علی أرجوحه، حنان بضفیره، موظفه تزغرد، موسیقی فرح فی الخلفیه یتخللها مؤثرات طیور تغرد واجراس تدق شرائط ملونه تهبط من أعلی.

الموظفون: يهللون

سراج: يضع على رأس حنان مفرش كأنه طرحة زفاف ثم يضع ذراعه في ذراعها ويتحركان نحو مكتبه وسط زفه يقيمها الموظفون وتحضرها أمه وخليل

الام: خمسه وخميسه ف عين اللي ما يصلي على النبي، الزملاء ينصبون

له بسرعه خيمه شفافه بها فراش، سراج وحنان يدخلان الخيمه ويرفع طرحتها ويقبلها

الموظفون: يشاهدونهما من خلف الحوائط الزجاجيه ويصفقون يتحول الموظفون والموظفات الى عشاق

ص خلیل: وهو یوقظ سراج اصحا یا سراج. تختفی حنان فیحتضن سراج الوساده ویقبلها

من خليل : هنيالك يا عم.

سراج: يتقلب ويأخذ وضعا غريبا على بديه وقدميه

ص خليل: هامسا امك شايفاك ما يصحش، فوق.

سراج: يزوم ويغمغم سيبنى يا خليل سيبنى.

خليل: مش ساييك.

تتوقف الموسيقي مع اظلام لثواني فيه صوت النيابه

من النيابه: دا اول حلم وصلحى المتهم بعدها، ودلوقتى هنشوف الحلم التائي.

تبدأ موسيقى الحلم العنيفه تعود الاضاء الموظفون جالسون سراج بدخل ويحييهم لكن لا احد يلتفت اليه

سراج: انتوا مش سامعنی ولا شایفنی؟ هو انا هوا؟ انا مش موجود؟

يتحرك لهم ولا احد ينظر نحوه كأنه غير موجود يلقى باوراقهم فيغلقون النافذه يتناول ما يشربونه ويشربه فيواصلون الشرب يهزهم ويدفعهم فلا يهتزون

الموظفون: سيادة المدير

سراج: ظط. ملعون اهوب واللي اوباجوه. ابكم رضى جمز هال»

مؤثرات صوت رياح قويه واصوات حيوانات وصوت طفل يبكى عود كبريت كبير مشتعل يلقى على الارض ويبقى مشتعلا سراج يدخل ويبحث هنا وهناك وينادى حنان..

الموظفون: لهم الان هيئة غريبه كالحيوانات يضحكون او يتهامسون عليه

سراج: يتحرك لحجرة فؤاد ويزيح ستارها او يضىء النور عنكبوت كبير معلق في الفراغ.

فؤاد: نراه من ظهره وهو يحاول احتضان حنان وهو يغمغم كأنه يأكل

حنان: تقاومه وهي تصرخ

سراج: يمسك بفؤاد ويشده

فؤاد : يستدير فنرى له رأس خنزير

سراج: يتراجع بفزع

فؤاد: يتقدم منه بخطوات حيوان

سراج: يمسك بشئ ويضربه على رأسه العنكبوت الكبير يسقط فوق سراج ويشل حركته.

فؤاد : يعود ليمسك بحنان

حنان: تستغیث به بصوت ممطوط کأنه یأتی من بعید سراج

سراج: يلتقط فتاحة اوراق من مكتب فؤاد ويضربه بها على رأسه اجيب عاليها واطيها.

سراج :يحاول ان يصرخ ويصرخ مره ثم يضيع صوته ولا يخرج

الموظفون : يزحفون على اربع ويقفزون كالحيوانات ويصرخون نار تشتعل في المكان وسط دخان

سراج: ابعدوا الاشباح. ابعدوهم عني.

ص خليل: وبعدهالك يعنى، فوق يا سراج اصحا يا بنى. ثم تثبت حركة المثلين كأنهم في صوره ثابته ونسمع اصوات في المحكمه

من النيابه: وانتهى شريط الطم المسجل عند هذا الحد

صبيت همهمه في القاعه

من القاضى: ترفع الجلسه للاستراحه وتعود للانعقاد بعد تلث ساعه من الحاجب: محكمه.

ستــار

الفصل الثانى المشهد السادس

المنظر: قاعه المحكمه

حاجب: الجمهور يتفضل في قاعة المحكمه عشان هنقفل الابواب.

بليغ: ايه اللي انت هابته ده يابني؟ حد يطم احلام م النوع ده؟

سراج: انا نفسى مستغرب. انا حلمت بده كله؟ وفي دقيقتين؟

مخلص: اسمح لى اهنيك ع الحلم البديع ده. حقيقى انت عندك خيال خصب وجميل.

بليغ: لمخلص انت بتحرضه عن الطم عشان توديه في داهيه؟

مخلص: انا بدافع عن المبدأ.

بليغ: احنا هنا عشان ندافع عن المتهم.

سراج: ارجوكم اتفقوا ما تضيعونيش وسطيكوا.

حاجب: محكمه

يدخل القنضياه

القاضى : ودلوقت بعد ما شفنا شريط الحلم الدفاع لسه مصرع الانكار؟ بليغ : انا ادفع ببطلان التسجيل بدون اذن.

النيابه: النيابه تضم اذن وتصريح التسجيل امانة المحكمه

بليغ: لا يمكن الاعتداد بهذا الشريط فقد لاحظنا به فقرات غير مترابطه وقفزات كثيره مما يجعلنا نشك انه تعرض لحذف او اضافه لبعض اللقطات عن طريق المونتاج

سراج: أيره فعلا. فيه لقطات ما حلمتش بيها خالص دى اكيد مدسوسه على حلمي

النيابه: من المعروف ان الشخص لا يتذكر حلمه بكل تفاصيله ونؤكد انه لم يتم حذف او اضافة لكن الاحلام بطبيعتها غير مترابطة. دا حلم هو دا فيلم سينما.

بليغ: الحلم غامض ومالوش اى معنى. مثلا كلمات كثيره غير مفهومه مجرد تخاريف.

النيابه: العبارات الغامضه تتضح فى ضوء الموقف الموجود بالحلم، فعندما يتهجم المتهم على رئيسه ويقول له كلمة «ظط» فهو يقصد بها طظ وعبارة «معلون اهوب» هى ملعون ابوه «واللى اوباجوه» هى في الواقع واللى جابوه وهكذا.

سراج: دا ظلم وافترا.

بلیغ : دی مجرد صدف، طب اتحدی حد یفسر لی «ابکم رضی جمز هال» تبقی ایه؟

سراج: تبقى اضربكم بالجزمه.

النيابه: ارجو تسجيل اعتراف المتهم

بليغ: لسراج: قلت لك اسكت انت.

مخلص: سجلوا زي ما انتوا عايزين، المتهم قصد كل اللي قالته النيابه فعلا.

بليغ: لمخلص هو انا هلاقيها منك ولا منه؟

مخلص: نعم قصد المتهم كل اللى قالته النيابه. لكن هذا لا يشكل أى خطوره على المجتمع.

النيابه: الخطوره واضحه. المة هم حلم بالعمل في المؤسسه كله لعب وغناء ورقص. قولوا لي بالله عليكم كيف يتأتى للعاملين ان ينجزوا عملهم وهم يغنون ويرقصون بخلاعه؟ انها دعوه لتعطيل الانتاج واشاعة الاسترخاء والكسل والعبث بين العاملين.

مظمى: ومين ادراك، ما يمكن تحسين احوال الموظفين والعمل في جو من البهجه والمرح هيزوبوا الانتاج ويتحسن مستواه فعلا؟

النيابه: كلام فارغ وأوهام.

مخلص: كل الاشياء العظيمه بدأت بحلم قيل انه خيال واوهام. لقد سخر الناس من فكرة الطيران واعتبروها نوعا من التخريف ولكن

الانسان طار في الفضاء ووصل للقمر.

النيابه: نأتى الان الى جزء خطير يهدد قيمنا وهو اقدام الحالم على الزواج من خطيبته دون مأنون شرعى، بل انه قضى ليلة الزفاف على مرأى ومسمع من الزملاء مما يشكل جريمة الفعل العلنى الفاضح.

مخلص: هو الحلم مش صوره ذهنيه داخل رأس الحالم؟

النيابه: أي نعم.

مخلص: طيب ما الدش بينقل لنا صور منيله بستين نيله.

النيابه: هذا تهرب من الاجابه، انا اريد ان اسمع من الحالم ما هو المبرر الذى جعله يطارح خطيبته الغرام في المؤسسه؟ ليه ما حلمتش مثلا انك تزوجتها بعقد شرعى وانكم في شقة الزوجيه؟

سراج: هات لى انت شقه. انا دايخ بقالى سبع سنين مالقتش عشه فراخ.

النيابه: اذن حلمك ليس مجرد خيال، بل انت في الطم تفكر وتخطط لما يمكن تفعله في الواقع

بليغ: لسراج قلت لك ما تتكلمش هيوقعك.

النيابه: وفي الحلم يتهم احد زملائه في العمل بالتهاون والاختلاس دون النياب اثبات ولا يكتف بهذا بل يحاول حرق المؤسسه بأكملها.

سراج: انا ما حاولتش احرقها، انا شفت عود كبريت مولع على الارض والشريط موجود.

النيابه: وليه ما حولتش تطفيه؟ بل لماذا لم تفكر في استدعاء المطافى؟

سراج: كنت ناوى، هو ذنبي انى صحيت من النوم قبل ما الحق اطفيه؟

النيابه: وما هو الدليل على هذه النيه وكيف نتشبت منها؟ وهل هي مسئولية الشرطه ان توقظك من نومك يا ريت لكن للأسف القانون لا يعطينا الحق في مقاطعة الأحلام.

سراج: مش معنى انى حلمت بالحريق انى نفسى المؤسسه تتحرق.

بالعكس، معناه انى خايف عليها. مع انها فعلا تستحق الحرق، النيابه: المتهم يقول انه خائف على المؤسسه ثم يقول انها تستحق الحرق، فأنظروا اى تناقض وتخبط فى أقواله؟

بليغ: الواحد ممكن يحب ابنه ومع ذلك يتغاظ من تصرفاته ويقول انه يستحق قطم رقبته انا تفسى بدافع عن موكلى ومع ذلك متغاظ منه وعايز اقطع له لسانه.

مخلص: في هذا الوقت الذي تحاكمون فيه شخصا على ما خطر لعقله الباطن وهو نائم يقدم البعض على ارتكاب جرائم ماديه حقيقيه فيسرقون ويعتدون ويقتلون.

المتهم: الله الله محاكميم هيغلط فيا يا زمل.

القاضى: هدوء يطرق المنصه لو سمحتم.. النيابه تدخل في الموضوع

النيابه: تبرر حلمك دا بأيه؟

سراج: معرفش بابیه، بس الحلم ماهوش جریمه. دا حریتی الوحیده متعتی البریئه.. حتحاسبونی علیه؟

النيابه: احلامك انت خطيره. احلام مفنوعه ضد القانون والمجتمع والبيئه.

سراج: احلامي تخصني وحدى .. محدش له حق يتجسس عليها .

النيابه: احلامك دايما تتحقق في الواقع.

سراج: دی حاجه بتاعة ربنا.. مش بأیدی انا.

النيابه: اذن اعترف مين حرضك وليه؟.

سراج: عقلى.. عقلى يا سعادة البيه.

النيابه: نطالب فورا بالحكم عليه

سراج: حرام انا عملت ایه؟

١

النيابه: تنكر ان حلمك فيه مشاهد جنسيه؟

سراج: وحد قالكوا تشوفوها وكمان تعرضوها؟ دى حريتي الشخصية وانتو انتهكتوها.

النيابه: الكلام دا لما يكون مشاهد بينك وبين زوجتك.

سراج: أرجو من المحكمه تقدير حالتي ومراعاة ظروفي. انا عندي تلاتة وتلاتين سنه ولسه عازب.

النيابه: ليه اعتديت ع المدير بتاعك في الحلم؟

سراج: لانه هو في الحلم عاملني وحش الاول.

النيابه: لكن انت اللى الفت الحلم، يعنى اتبليت عليه عشان تلاقى مبرر تضربه.

سراج: لكن هو اساء معاملتي في الواقع.

النيابه: المحكمه مالهاش دعوه باللي بيحصل في الواقع. ومع ذلك كان ممكن تقدم شكوى ضده لكن واضيح أنك فضلت طريق العنف.

سراج: الحلم في نظركم عنف؟

النيابه: الحلم رغبه مكبوته تمهيدا لتحفيقها في الواقع.

سراج: لكن انا ماضربتوش في الواقع

النيابه: واحنا هنستنى عليك لما تضربه؟ ثم للقاضى النيابه تكتفى بمناقشة المتهم مؤقتا ونطلب استدعاء الشهود الذين ظهروا في حلم المتهم لمناقشتهم.

القاضى: نادى على الشهود

حاجب: الشاهد الاول

خليل يتقدم للمنصه وهو يرتجف

القاهبي: اسمك وسنك ومهنتك

خليل: خليل صديق وفي ٢٣ سنه، عاطل

القاضى: قول والله العظيم اقول الحق.

خليل: والله العظيم اقول... الحق.

القاضى : النيابه تسأل الشاهد.

النيابه: انت بتطم يا خليل؟

خليل: انا؟ لا يافندم، اعوذ بالله.. انا بعرف ربنا.

النيابه: جاء في اوراق التحقيق انك شاركت المتهم في حلم ليلة ١٣

المشئومة.

خليل: انا شاركته في السرير بس يا فندم.

النيابه: نمت قبله ولابعده؟

خليل: بعده يافندم اصل مكانش جايلي نوم وهو قالي انه عايز ينام

النيابه: عايز عشان يحلم، مش كده؟

خليل: والله معرفش يافندم هو ادرى بنفسه.

سراج: كنت عايز انام عشان تعبان، هتحاسبوناع النوم كمان؟

القاضى: اسكت يا متهم.

النيابه: كويس يا خليل. بما انك نمت بعده اذن تقدر تحكى لنا اللى شفته والمتهم بيطم.

خليل: وانا اشوف الحلم معاه ازاى؟

النيابه: قصدى تقولنا المتهم وهو نايم كان بيتصرف ازاى؟

خليل: زي الناس يا فندم، واحد نايم.

النيابه: احكى لنا التفاصيل كان بيعمل ايه وهو نايم؟

ځليل: کان بيشخر.

سراج: انا كنت بشخر يا كداب؟

خليل: ايوه وانت كنت شايف نفسك؟

بليغ: انا اعترض واطلب حذف الكلام عن الشخير من محضر الجلسه.

مخلص: ليه يا استاذ بليغ؟ ما فيش تهمه في القانون عن الشخير.

بليغ: من باب الاحتياط. يمكن بكره يطلعوا بيها قانون

مخلص: الشخير حق دستوري لكل مواطن.

القاضى: لو سمحتم. النيابه تستأنف سؤال الشاهد.

النيابه: قولنا يا خليل. المتهم وضعه كان ايه اثناء النوم؟

خليل: كان حاضن المخده.

النيابه: ارجو اثبات هذا في محضر الجلسه. كان حاضن المخده.

سراج: ایه دی فیها ست اشهر؟

النيابه : وايه كمان؟ اتكلم يا استاذ خبيل ما تتكسفش.

خليل: هقول وربنا يسامحنى. كان بيتقلب وبيرفص برجليه وشد الملايه من عليا وسابنى عريان.

النيابه: عايزين اكتر من كده دليل على انه كان بيطم بفعل فاضح؟

بليغ: انا اعترض. دا مش دليل كافي.

سراج: ولا دليل. دى مخدتى ولا مؤاخذه بقى، حد شريكى؟ كانت المخده اشتكت لكم؟

النيابه: وايه كمان يا خليل؟ كمل.

خليل: استغفر الله العظيم. وكان وهو نايم بيزوم ويبرطم كده بكلام مش مفهوم.

النيابه: اكيد كان بيقول ساعتها هجيب، عاليها واطيها.

خليل: معرفش، جايز.

بليغ: انا اعترض دا ايحاء للشاهد.

سراج: انا قلت كده يا ضلالى؟

القاضى: الاعتراض مقبول

النزابه: طيب، الصبح لما صحيت يا استاذ خليل حصل ايه؟

خليل: انا صحيت قبله هزيته وقلت له فوق يا سراج قال لى كنت سيبنى نايم لحد ما اكمل الطم

النيابه : هذا ما يثبت ان الطم يتم بإرداة المتهم الواعيه كما انه دليل مؤكد على انه غير ندمان على حلمه.

خليل: لسراج والله ما كان قصدى اوديك في داهيه

النيابه: قولنا بقى حالته كانت ايه لما صحى؟

خليل: الحقيقة هو كان.. يسكت ثم لبليغ بس انت هتعترض؟

النيابه: مايهمكش منه اتكلم

خليل: كان متغير شويه ومزاجه متعكر وقال.. قال اللهم اجعله خير.

النيابه: أه نقف هنا بقى. تفتكر كان يقصد أيه بعبارة اللهم أجعله خير؟

خليل: معرفش.

النيابه: كان يقصد ان الخير ان احلامه تتحقق؟

بليغ: انا اعترض.. دا بيملى الاجابه للشاهد

القاضى: الاعتراض مقبول.

النيابه: المتهم حكى لك الحلم؟

خليل: ايوه.. بس مش كله، اللي كان فاكره منه.

النيابه : وهذا دليل على ان الطم ليس مسالة شخصية لان الحالم يشرك الخرين فيه.

القاضى: الدفاع يحب يسأل الشاهد؟

بليغُ: ايوه

خليل: انا اعترض. انا مش عايزه يسألني. دا احراج للشاهد

القامعي: جاوب وانا اللي اقرر.

بليغ: ١ المتهم حكى لك الحلم اتأثرت بيه؟

خليل: لا انا ما اتأثرش بأي حاجه ولا بأي حد.

بليغ : كويس يعنى مافيش خطر انه حكاه.

خليل: معرفش انتو بهوات وكبار وتعرفوا اكتر مني.

بليغ : قولى يا خليل انت مابتحضنش المخده؟

خليل: حاشالله، عمري في حياتي ماعملتها. انا متربي كويس.

بليغ: ليه هي تهمه؟ حاجه وحشه؟

خليل: معرفش. انا مش دارس القانون كويس.

بليغ: انت شفت سراج بيحضنها لانك كنت صاحى. مين ادارك انك مابتحضنش المخده وانت نايم؟

خليل: بس احضنها ليه؟

بليغ : عاقل يا خليل لان ما فيش أي فايده من ان الواحد يحضن المخده. وهكذا ترون يا حضرات المستشارين انه لا توجد أي شبهة في ان يحضن موكلي وسادته بل ان هذا من الامور الطبيعيه حتى ان

الاغنيه الشهيره تقول (اسال دموع عنيا، اسال مخدتي.. كم دمعه رايحه جايه، تشكى لك وحدتى)

خلیل: یعنی انت مش معترض؟

بليغ: اطلاقا. وتقدر تتفضل.

خليل: يعنى هتفرجوا عنى؟ الحمد لله

مخلص: مكانك لو سمحت

خلیل : خیر؟

مخلص : قلت في شهادتك انك مابتحلمش. فيه حد في الدنيا ما بيحلمش يا خليل؟

خلیل: احلامی قلیله خالص وکلها احلام محترمه ونظیفه.. ثم انا راجل راضی بحالی یبقی احلم لیه؟

مخلص: انت قلتلنا بتشتغل ایه؟

خلیل : عاطل

مخلص: وكيف يمكن ان تكون عاطلا وترضى بحالك؟ مثلك لابد ان يكون ساخطا على وضعه وحاله بل ومجتمعه كله وهذا يعنى انك كاذب ومنافق.

سراج: ايوه منافق وكان دايما يقولى دى حكومه ظالمه.

مخلص : وهكذا يتضع لعدالتكم ان الشاهد يخشى ان يعترف بالحقيقه " لانه و القع تحت ضغط وارهاب معنوى وبالتالى فشهادته مزيفه ولا " يُعْتُد بَها.

خليل: انا اعترض، انا شهادتى سليمه يا سعادة البيه بس ماجبتش مجموع، وانا عمرى ما جبت سيرة الحكومة بالغلط. طب احلف لكم بالمصحف انا معرف مين الصوكمه دى حتى. انا برئ يا سعادة القاضى.

القاضى: شكرا للشاهد. اتفضل

خلیل: یعنی ممکن اروح؟

القاضى: ايوه.

خليل: يحيا العدل.. يحيا العدل

حاجب: الشاهد الثاني

حنان تتقدم للمنصه

القاضى: اسمك وسنك ومهنتك

حنان عبد العظيم، موظفه بالمؤسسه العامه وسنى مكتوب عندكم في الورق.

القاضى: قولى والله العظيم اقول الحق

حنان: والله العظيم اقول الحق

القاضى: النيابه

النيابه: انتى شوفتى الطم. ايه رأيك؟

حنان: هو طبعا مش قصده، دا حلم مش حقیقة، وهو کان دایما کویس معایا.

سراج : كتر الف خيرك.

النيابه: افهم من كده انك مش ممانعه يقبلك في الحلم؟

حنان: لأ مش قصدي.

النيابه: لكن المتهم اقدم على تقبيلك في الحلم فعلا فهل..

حنان: مقاطعه انا مش مسئوله. انا ماليش دعوه.

النيابه: انا لسه ماكملتش كلامي.

حنان: انا مالیش ذنب فی ای حاجه حلم بیها.

النيابه: افهم من كده انك موافة على كل تصرفاته معاكى في الطم

حنان: طبعا وفيه واحده ترضى تنفضح بالشكل ده؟ ربنا يسامحك يا سراج

سراج: انا فضحتك ولا هم اللي ذاعوا الطم وفرجوا الناس عليه؟

حنان: يا سراج قدر موقفي..

سراج: انا مقدر موقفك يا حبيبتي. لكن انا هيتحكم عليا. ترضى بكده؟

حنان: بعد الشر عليك.

القاضى: السهوكه دى مش فى المحكمه، ابقوا روحوا كازينو واتسهوكوا مناك النيابه اتفضل يا استاذ..

النيابه: المتهم تعلل بطول فتره الخطويه كتبرير لحلمه، فهل حلمتى بشىء مثل هذا؟

حنان: ايوه مستدركه بسرعه قصدي لأ.

سراج: دا انتى حلفتى ع المصحف، هتخشى النار،

النيابه: ولا ممكن في المستقبل تحملي بحاجه زيها؟

بليغ: أنا أعترض. لا يصبح السؤال عن شي في المستقبل

القاضى: الاعتراض مقبول.

مخلص: انا اشجب السؤال اصلا، هذا تدخل في خصوصيات الشاهده.

القاضى: الاعتراض غير مقبول.

النيابه: انتى محرجه تجاوبي ع السؤال يا انسه حنان؟

الاب: لأطبعا جاوبي يا بت وارفعي راس العيله.

حنان: اجاوب لو عايزين.

القاهبي: اتفضل اسأل.

النيابه: سؤالي هو.. هل ممكن انتي كمان تحلمي انه بيقبلك؟

حنان: لا طبعا.

النيابه ك وبماذا تحكمين على حلمه بيكي وبماذا تسميه؟

حنان: اسميه عيب وما يصحش.

النيابه : بس كده؟

حنان: و.. قلة ادب طبعا.

سراج: متشكر جدا يا حنان..

النيابه: طيب نفترض انه اقدم على تنفيذ حلمه ده في الواقع إيه هيكون تصرفك.

حنان: هزقه واصوت والم الناس.

النيابه: افترضى ماكنش فيه ناس.

حنان: هضربه بالقلم

سراج: والله؟؟

النيابه: بما ان الشاهده ترفض ما اتاه فى الطم من تصرف معها لا تصبح تهمته مجرد أرتكاب فعل فاضح علنى، بل إكراه أنثى على ارتكابه، اى اغتصاب ف الواقع.

سراج: عاجبك كده؟

حنان: ابويا واقف.. عايزني اقول ايه؟

حنان: باكيه غصب عنى يا سراج. اعذرني.

بليغ: انسه حنان تحبى حد يراقبك وانت في جلسه خاصه مع خطيبك؟ حنان: لأطبعا.

بليغ: محصلش ان جد تعمد يتلصص عليكم او شافكم بالصدفه؟ حنان: لأ محصلش ابدا.

بليغ: نفترض ان حد اتلصص عليكم من غير ما تاخدوا بالكم؟

حنان: دا مش من حقه وتبقى قلة ادب منه.

الاب: ليه هو انتو كنتوا بتعملوا ايه من ورا ضهرى؟

حنان: مستدركه بس والله كل جلساتنا بريئه

بليغ: امال ليه بتقولى ان اللي يراقبكم يبقى قليل الادب؟

حنان: باكيه معرفش.

سراج: ارجوك ماتضغطش عليها.

مخلص: انتى مش بتحبى المتهم؟

حنان: مش فاهمه ازای یعنی؟

مخلص: سؤالي واضح. ايه مشاعرك ناحيته؟

حنان: ماعنديش مشاعر. انا زميلته وهو خطبني وابويا وافق.

سراج: هو الحب بقى تهمه بتتبرأى منها؟

النيابه: ارجو من المحكمه منعهم التأثير على الشاهده.

القامي : ما تتكلمش خالص يا سراج.

مخلص: مره اخرى يتضح لعدالتكم ان الشاهده واقعه تحت تأثير الخوف من فضع مشاعرها الخاصه وهو الامر الذي تكفله حقوق الانسان.

الاب: باللا بينا يابت بلاش مسخره.

بليغ: احنا لسه عايزين نسألها

سراج: ماتسالهاش في حاجه ولا تعبرها. انا م النهارده ماليش كلام معاها.

حنان: باکیه مانظلمنیش یا سراج. غصب عنی. حنان تخرج مع ابیها

القاض : نادي ع الشاهد اللي بعده

حاجب: الشاهد الثالث

فؤاد يتقدم للمنصه.

فؤاد : فؤاد الشماشرجي ٥٣ سنه، رئيس مجلس ادارة المؤسسه العامه. والله العظيم اقول الحق.

القاضى: ايه اللي تعرفه عن المتهم؟

فؤاد: المؤسسه كانت ماشيه كويس وبتكسب وفجأة بدأت تخسر بدون سبب ظاهر. انا احترت. الميزانيه ادعمت م الحكومه اكتر من مره رأس المال اتضاعف. استوردنا احدث الاجهزه عشان نرفع كفاءة الانتاج ومع ذلك فضلت الخسائر تزيد سنه ورا سنه وانا مش فاهم السر. وفي يوم موظف غيور على مصلحة العمل نبهني لموضوع الاحلام الوحشه اللي بيحلم بيها المتهم، الحقيقه انا ماخدتش الكلام ده في بالي، رغم ان احلامه كان بيتناقلها كل العاملين وبقت مثار تعليقاتهم.

سراج: وهو انا المسئول عن المؤسسه ولا هو؟ انا حيالله محاسب اجمع واطرح وبس. ليه ما يكونش وشه هو اللي وحش، ما انا وهو اتعينا في سنه واحده.

القاضى: ماتقاطعش الشاهد يا متهم.

فؤاد: ولما استمرت الاحلام تتكر والخساير تزيد، هنا ابتديت الاحظ العلاقة اللي بين الاتنين رجعت للاوراق اكتشفت ان الخسائر بدأت ترف بعد ما اتعين الاستاذ سراج بوقت بسيط. وتحت ايدى وثائق، بينات واحصائيات علميه تثبت بالارقام والارقام ماتكذبش وانا بودعها امانه المحكمه.

سراج: طب استالوه، المؤسسه اللي كان ماسكها قبل كده خسرت قد ايه؟ النيابه: دا خروج عن الموضوع الاصلي يا سيادة الرئيس، موضوعنا احلام المتهم.

القاضى: الاعتراض مقبول، كمل يا استاذ فؤاد.

فؤاد: غير الخسائر لاحظت ايضا حاجات غريبه بتحصل في المؤسسه اصابات كتيره للعاميلن، زياده حالات الطلاق بينهم. دا غير احداث غامضه بتحصل للكل وحتى انا شخصيا ماسلمتش منها، ولو انى اترفع عن ذكرها، الا اذا سائتونى عنها.

النيابه: زي ايه يا استاذ فؤاد؟

فؤاد: مثلا حصل لى شئ مالوش أى تفسير. فى يوم صحيت لقيت قورتى ورامه ومزرقه ويمكن لسه اثار الاصابه موجود اهيه. ، الدكتور اللى عالجنى استغرب جدا وقالى مؤكد اتعرض لاصابه متعمده. قلت له انى كنت نايم مصدقش.

النيابه: وامتى حصل لك ده؟

فؤاد: من حوالي كام اسبوع.

النيابه: حاول تفتكر بالتحديد.

فؤاد : بالتحديد يبقى يوم ١٤ الشهر اللي فات.

النيابه : يعنى ليله ١٣ منه. نفس ليلة الحلم موضع الاتهام.

فؤاد: فعلا. تصور انا ماخدتش بالى الا دلوقتى حالا.

سراج: يا ضلالي.

النيابه: هكذا ترون يا حضرات القضاه.. ان حلم المتهم قد تحقق بالفعل.

سراج: ايه التخريف ده؟

مخلص: الدفاع لا يقبل هذا الكلام هاتولنا دليل عليه.

النيابه: الدليل هو الحلم نفسه.

سراج: دا كداب، تلاقى مراته هى اللى ضربته، كل المؤسسه عارفه انها بتضربه بالشبشب

النيابه: انا امنعك تسي للشاهد.

فؤاد: انا معايا شهاده طبيه أنها اصابه بأله حاده زي اللي ف الحلم بتاعك.

سراج: تبقى مجرد صدفه. دا تلفيق. دا ظلم.

مخلص : نعم فقد حلم موكلى بأحداث كثيره ومختلفه، اشمعنى الاعتداء عليك بس هو اللي يتحقق؟

النيابه: ومن ادرانا ان بقية ما حلم به لن يتحقق غدا او بعد غدا

بليغ: لما يبقى يتحقق ابقوا اتهمونا وحاسبونا

تدخل السكرتيره وتهمس بشئ في اذن فؤاد

فؤاد: مش ممكن. انتى متأكده؟ ثم للقاضى يا سيادة القاضى اسف للمقاطعه لكن جالى دلوقتى خبر يهم المحكمه

القاضى: اتفضل.

فؤاد: من ساعه الاربع شب حريق كبير في مبانى المؤسسه، ومازالت قوات الامن تحاول السيطره عليه، ضبعه في القاعه

القاضى: هدوء من فضلكم

سراج: يعنى ايه؟ انا اللي ولعتها؟ مانا قدامكم اهو.

مخلص : انا احتج واشجب واعترض.

زملاء: حرام عليك. خربت بيتنا، خلى عندك ضمير

الام: انتوا كلكوا على الواد؟ عايزين من ابنى ايه حرام عليكم

بليغ: صائحا احنا بنطلب التأجيل سيادة الرئيس

القاضى : قررت المحكمه تأجيل نظر القضيه لجلسة ١٧ /١٧ رفعت الجلسه.

اظــــالم

المشهد السابع

المنظر: المحكمة

حنان: انا خايفه يا سراج.

سراج: ماتخافیش المتر بلیغ طمنی ان موقفی مش وحش.

حنان : مش قصدى، انا خايفه اللى حلمت بيه يتحقق، انت ناسى اننا وانت كنا في الحلم بنعمل ايه والناس كلها شايفانا؟

سراج: انتى كمان صدقتيهم يا حنان، حتى انتى؟

حاجب: محكمه.

القاضى: النيابه لها طلبات؟

النيابه: ايوه. ارجو من المحكمه ضم واقعة حريق المؤسسه الى اوراق القضيه

مخلص: انا احتج.

بليغ: لا مانع لدينا، نحن لا نخاف شيئا

النيابه: يقرأ من ورقة اثبتت التحقيقات الأوليه ان سبب الحريق عقب سيجاره، ظل مشتعلا بعد انتهاء فترة العمل وحمدا لله ان الحريق لم يلتهم الا مخازن المؤسسه فقط. وانا عايز اسال المتهم هل صحيح انه بيدخن سجاير؟

بليغ : اعترض مش هو الوحيد اللي بيدخن في المؤسسه. فؤاد بيه نفسه بيدخن؟

النيابه: بس هو الوحيد اللي حلم بأن المؤسسه هتتحرق بسبب عقب سيجاره.

سراج: وافرض حلمت، اناما كنتش موجود في المؤسسه لما اتحرقت.

فؤاد : ايوه بس نيتك وحشه يا استاذ. والنيه الوحشه مايجيش منها خير.

مخلص: انا احتج واشجب واندد بهذا التفكير الخرافي غير العلمي.

القاضى: الخطب دى مش مكانها هنا ابقى ندد فى أى حته تانيه زى ما يعجبك النيابه: امال المتهم يفسر بأيه ان المؤسسه تتحرق وبنفس الطريقه اللي حلم بيها؟

سراج: افسر بأننا في موسم الجرد اشمعنى المخازن اللي تتحرق؟

فواد: انا ما اسمحلكش تشكك في سمعة المؤسسه.

القاضى: هدوء من فضلكم.

بليغ: اسكت انت يا سراج وسيبنى اشوف شغلى

سراج: اسكت دا إيه؟ لفؤاد طب والله لاخبطك المره الجايه حلم يجيب احلك.

النيابه: ارجو تسجيل هذا بمحضر الجلسه. المتهم يهدد الشاهد تحت سقف المحكمه بأن يخبطه حلم.

فؤاد: وانا أطالب المتهم بسحب كلامه والاعتذار لي فورا.

مخلص : هذه مهزله. لا يوجد في القانون تهم تسمى الشروع في حلم حتى يعتذر عنها موكلي.

بليغ: لا مانع لدينا من الاعتذار وانا اسف نيابة عن موكلي. المتهم منفعل يافندم ولا يقصد التهديد مطلقا.

المتهم: ينهض واقفا ويصيح محدثا سراج انت الحق عليك يا سراج. تودى نفسك فى داهية عشان حلم؟ كنت قولى انا يا زمل وانا احرق لك المؤسسه بجد واجيب عاليها واطيها.

سراج: الف شكريا معلمه

القامي : اقبضوا على اللي اتكلم؟

المتهم: وهو يشير في اتجاه خرج من هنا سعادتك.

سبراج: عكرمه عنده حق. طب والله مانا سايبك يا فؤاد واهى بجملة التهم.

فؤاد : شاهدین یا حضرات، انا طالب حمایتی

بليغ: اسراج: قلت اك اسكت هتودى نفسك في داهيه

مخلص: يتحرك منفعلا في اتجاه فؤاد كأنه سيضريه تلفق له تهمه

وتجرى تشتكى؟ طب لو هو معرفش ياخد حقه منك، انا بقى اللى اجيبهوله بأيديا.

بليغ: لمخلص: وهو يمسك به ماتعقل انت راخر

القاضى: دا فوضى بقى مش محكمه. لمخلص اهدى يا استاذ مخلص والا احبسك بتهمة اهانة المحكمه

مخلص: اجبسني ولكن هذا لايفت في عضدي، مجرد جنحه وانا مستعد التضميه

بليغ: لا مانع لدينا وانا جاهز للدفاع والمرافعه عن زميلي يافندم.

مخلص: انت بالذات لأ.

النيابه: ارجو الا تتأثر المحكمه بدفاع المتهم. فتحت يدنا شريطا اخر بحلم جديد اكثر خطوره، سيدين المتهم ويخرس الدفاع.

بليغ : انت حلمت تاني؟

سراج: ايره، امبارح غفلت دقيقه غصب عني.

بليغ: انا مش قلت لك ماتتصرفش من غير ماتقولي

سراج: وهو بأيدى؟ ومع ذلك دا حلم برئ وعادى مافيهوش حاجه م اللى بيقول عليها.

النيابه: دا من وجهة نظرك. فهو يتضمن جرائم بشعه لا في حق افراد بعينهم فقط بل في حق الوطن والمجتمع كله.

سراج: انا متأكد من نفسى وقابل للتحدى بانكم تعرضوا الشريط.

بليغ: لا مانع لدينا من عرض الشريط.

حنان: استنوا، انا معاك في الطم يا سراج؟

سراج: لا ماتخافیش ماکنتیش فی حلمی

حنان: وإنا اضمن منين؟ تلاقيك حلمت وناسى.

سراج: اطمني انا خلاص بطلت احلم بيكي.

حنان: اخص علیك یا سراج یعنی مابقتش تحبئی؟ یعنی اللی حلمت بیها دی اجمل منی؟

القاضى: اتلم انتى وهو

النيابه: اطلب من عدالتكم الاذن بعرض الشريط في جلسه سريه نظرا لبشاعته وخروجه عن كافة القيم والاخلاقيات وكي لا يتأثر به جمهور الحاضرين الكرام.

مخلص: انا اعترض على جعل الجلسه سريه.

بليغ: لا مانع لدينا من جعل الجلسه سريه.

مخلص: اذا كانت النيابه خايفه الجمهور يتأثر يبقى دا معناه ان حلم المتهم هيعجبهم.

النيابه: بالعكس الشريط يحتوى على مناظر مخله بالاداب وعبارات مسفه بذيئة وحركات هابطه ومعانى هدامه من شأنها أن تؤذى مشاعر جمهور الحاضرين الكرام.

مخلص: احتج على هذه الوصايه فجمهور الحاضرين هنا اشخاص بالغون ويمكنهم التمييز، ماتفرض وصايتك ع الناس يا حضرة وكيل النيابه. اطلب الاحتكام الى جمهور الحاضرين، انتو تقبلوا يمنعوكم من مشاهد الطم؟

النيابه: هذه محكمه وانا امنعك من استفتاء الجمهور

القاضى: اهدأ يا استاذ مخلص،

مخلص: لن اهدأ. انا اشجب واحتج واندد واعترض. واذا اصريتم على السريه انسحب

القاضى: هدوء من فضلكم، عشان المحكمه تتشاور في القرار. هيئة المحكمه تتشاور

القاضى: قررت المحكمه عقد الجلسه سريه لمشاهدة حلم المتهم،. تخلى القاعه مؤقتا من الجمهور وتعود للعلنية بعد ذلك.

مخلص: وأنا اعلن انسحابي من الدفاع احتجاجا على هذا التعتيم. بليغ: لا مانع لدينا.

سراج: وانا ذنبي ايه يا استاذ مخلص؟

مخلص: لم أأت الى هنا للدفاع عنك وإنما عن مبدأ. انا هنا فقط لكى اسجل موقفا للتاريخ.

سراج: وعشان خاطر التاريخ اروح انا في داهيه؟

بليغ: لامانع لدينا

مخلص: نعم، الافراد مثلك زائلون اما التاريخ فهو الشيء الوحيد الذي يبقى..

القاضى: اخلى القاعه

حاجب: الجمهور يخلى القاعه. الجلسه سريه.

بيداً خروج الجمهور ومنهم حنان وخليل والام والاب والزملاء والشهود تفياء انوار الصاله وتطفأ انوار المسرح عدا الشاشه نسمع همهمات وصرخات حزن وفرح واصوات غير مفهومه واضواء تتناثر واشباح تتموج مع موسيقي غريبه.

تعود الإضاءة ويدخل الجمهور ثانية

النيابة: بتحدى والان وقد شاهدتم وقائع الطم. اريد ان اعرف ما هو رأى المتهم ودفاعه والحلم يثبت خيانته لاسرته ووطنه وتحلله من كل قيم بل يثبت كفره وان الشيطان قد عشش فى ذهنه ووسوس له بالاحلام المريضه.

سراج: كذب. انت جبت الكلام دا منين؟ الحلم مافيهوش حاجه من دى. النيابه: اننى اترك لعدالتكم الحكم على هذا الحلم الفاسد الفاسق العفن. واشهد المجتمع على ما رأيناه من فجور وشطط بل واحتكم الى الرأى العام كله..

سراج: هو الرأى العام دا شاف ولا سمع حاجه؟

حنان: اخص عليك يا سراج، ليه تحلم بكده. ليه؟

سراج: انا ماحلمتش بحاجه وحشه.

القاضى : ما تتكلمش بدون اذن.

سراج: ما تتكلم انت يا استاذ بليغ.. ما تقول حاجه

بليغ : في الواقع، في الواقع انا عبايز اوضيح ان المتهم كيان واكل اكله جامده قبل ما ينام ولذلك لابد ان نلتمس له العذر.

سراج: هو دا اللي ربنا فتح بيه عليك؟ انا عايز اتكلم يا سيادة القاضي.

بليغ: مقاطعا وانا بطلب التأجيل يافندم.

سراج: من حقى ادافع عن نفسى

بليغ : موكلي في حاله نفسيه عصبيه لا تسمح له بالكلام المتزن.

سراج: وانا مصر اتكلم واوضح موقفى، انا متهم بتهم بشعة.

القاضى: بعدين يا سراج هديك الفرصه. تؤجل القضيه الجلسه ١٣ الجارى، رفعت الجلسه.

يخرج القضاه

سراج: فيه ايه. اتصرفت كدا ليه يا متر؟

بليغ: لازم ناخد فرصه نفكر بهدوء.

سراج: انا لا يمكن اهدا غير لما ادافع عن نفسي.

بليغ: بتوتر انا عايزك تطمن خالص.

سراج: وشك مايطمنش.

بليغ: لأ اطمن قدامنا الاستئناف والنقض.

بليغ يخرج

حنان: باللابينا يا بابا

الاب: مش ماشي لما ترمي له الدبله في وشه الاول

حنان: يا بابا..

الاب: انا قلتها كلمه. انتى ماسمعتيش حلم بأيه الفاسد المنحل الكافر؟

حنان: طب اسبقنى وانا محصلاك.

الاب: ربنا يخرجنا م الجرسه دي على خير.

الابيخرج

حنان تقترب من سراج كده تفضحني يا سراج؟

سراج: قلت لك ماكنتيش معايا في الحلم دا

حنان: بعد ایه مخلاص اسمی ارتبط باسمك. ولما توصل للكفر وخیانة الوطن..

سراج: يا حنان اسمعيني. ان حلمي مافيهوش حاجه تسئ لي أو تسئ لك. ومستعد احكيهولك.

حنان: لا ارجوك، انا اخلاقي ماتسمطيش اسمع الحاجات دي.

سراج: وانتى شفتى حاجه؟ حلمى مافيهوش حاجه تتكسفى منها.

حنان: طبعا ما انت لازم تدافع عن نفسك وتقول كده.

سراج: طب اسمعى منى الحلم واحكمى انتى زى ما يعجبك.

حنان: يبقى هتألف لى حلم تاني، زى ماكدبت ع المحكمه.

سراج: هما اضطروني اكدب لانهم بيفسروا حلمي غلط.

حنان: يبقى مش هتحكي لي الحلم كله وهتخبي عليا الحاجات الوحشه.

سراج: هما اللي خبوا الحقيقة لما منعوا الناس تشوف الحلم.

حنان: وهما عملوا الجلسه سريه ليه؟ مش عشان مايفسدوش اخلاق الناس؟

سراج: طب امال ازاى اثبت لك انى برى؟

حنان: بحيره معرفش

سراج: خلاص يبقى لازم تصدقى قلبك. وقلبك عارف كويس.

حنان: مش مهم أنا أصدقك، المهم المحكمة والناس والمجتمع كله.

العسكرى يجر سراج بعيدا

سراج: حنان...

حنان : سامحنی، غصب عنی مش بایدی، سامحنی یا حبیبی،

سراج: مدام حتى انتى اتخليتى عنى، يبقى مش هدافع عن نفسى ، احكموا عليا وخلصونى.

اظــــالم

المشهد الثامن

المنظر: المؤسسة

يضم مكتب الموظفين ومكتب فؤاد ويشبه ديكور الطم لكنه يبدو اكثر واقعيه

> * * * * المظفون جالسون تدخل حنان

> > **حنان :** صباح الخير

الزميل: صباحيه مباركه.

حنان: نعم؟

الزميل: لا ولا حاجه.

كلهم ينظرون نحوها ويتهامسون فيما بينهم

امينه: معرفتيش يا حنان شريط الحلم التاني دا كان فيه إيه؟

حنان: وإنا هعرف منين؟

مسائق: مدام منعوا الفرجة عليه يبقى اكيد عشان ويهمس له في اذن زميل

الزميل: بدهشه واستنكار لأ

صادق: زى ما بقواك انا سامع الكلام دا فى نشرة اخبار البى بى سى امينه: بيقولوا الشريط عرضوه فعلا فى السى ان ان وتهمس لموظفه فى اذنها

خيريه: يادي الفضايح، صحيح ياما تحت الساهي دواهي

صادق: عايزين الحق دى فضيحه للمؤسسه كلها، احنا بقى شكلنا وحش.

حنان : تنهار باکیه

تدخل السكرتيره

سكرتيره: ماتزعليش منهم يا حنان، واعذريهم

حنان أنا ضميرى بيأنبنى عشان اتخليت عن سراج. انا مش عارفه هو حنان أنا مش عارفه هو حلم بأيه. بس مهما كان هو انسان طيب وبيطم لنفسه مايقصدش يأذى حد.

سكرتيره: المشكله يا حبيبتى مش انه بيحلم، المشكله انه بيتكلم ويحكى وفضح فؤاد بيه. بس انتى ف ايدك تصلحى الموضوع.

حنان: انا؟ ازاي

سكرتيره: تخلى سراج يروح يتأسف له، وبالشكل ده فؤاد بيه يتنازل عن شكوته في المحكمه ويقبل اعتذاره عن احلامه، تقوم المحكمه تديله حكم مخف او حتى براءه.

حنان: طب بس فؤاد بیه یرضی؟

سكرتيره: طبعا انا سكرتيرته وعارفاه، قلبه ابيض وعقله صغير، ينضحك عليه بكلمتين، والاهم من دا انه بيعزك معزه خاصه. روحى ابلفيه بكلمتين حلوين.

حنان: طيب احاول.

سكرتيره: تعالى معايا.

السكرتيره وحنان تدخلان على فؤاد

سكرتيره: الانسه حنان عيزه تقابل سيادتك.

فؤاد : عایزه ایه؟

حنان: انا جايه اترجاك تسامح سراج

السكرتيره تخرج

فؤاد: اسف هو اللي ابتدى وبقى يطم لى احلام زى وشه. وانا بتشاءم حنان: والله ما كان يقصد يا فؤاد بيه.

فؤاد: انا يخليني اكنس المؤسسة واسيئها؟ انا يخليني اهجم عليكي وابوسك بالعافيه؟

حنان: العفويا بيه. بس انت قلبك ابيض.

فؤاد: دا انا اهبل وينضحك عليا بكلمتين حلوين.

حنان: وانا مستعده اجيبه لحد عندك يعتذر لك وياكل بعقلك حلاوه.. قصدى..

فزاد: الاعتذار مش كفايه. لازم يصلح موقفه ويثبت حسن نيته.

حنان: ازای؟

هؤاد : يحلم لي حلم كويس.

حنان: وهو بكيفه؟

فؤاد: طبعا احلامه من خياله وخياله جزء من دماغه ودماغه مسئوله عن افكاره، اشمعني يعني مايحلمليش الا بالسوء؟

حنان: اعذره ظروفه وحشه.

قؤاد: دا سبب ادعى انه يتفاعل ويحلم بحاجات حلوه.

حنان: انا مقتنعه بس معرفش هقدر اقنعه ولا لأ.

فؤاد: خلاص، مدام انتی مقتنعه دا یکفینی. انتی بالنیابه عنه، احلمی لی ج حلم کویس. وانا اسامحه.

ح**نان** : انا؟

هزاد : ومالك اتخضيتي ليه؟ هو انتي بتكرهيني؟

حنان: ابدا يافندم بالعكس والله ..

هٔؤاد : بالعکس، معناها بتحبینی.

حنان: ط.. طبعا

فؤاد: بس انتی عمرك ما قولتیلی. لیه كنتی ساكته دا كله؟ بتتكسفی؟ هاها. قولیلی بقی هتحلمیلی بأیه؟

حنان: مش عارفه، لما انام واصحى ابقى اقولك.

قؤاد: وانا لسه هستنى؟ اقعدى. استرخى خالص. غمضى.. اسرحى بخيالك. ياللا احلميلى.

تخفت الاضامه على مكتب فؤاد . بيخل سراج مكتب الموظفين الكل ينظر نحوه بدهشه سراج : مستغربين كده ليه كأنكوا شوفتوا شبح. افرجوا عنى بكفاله. مش هتقولولى مبروك؟

لا احد برد عليه

سراج: عارف أن شكلي يخوف. بس أصل بقالي كام يوم مادقتش طعم

النوم. خايف انام احلم وانا مش ناقص. ويا عالم ممكن احلم بأيه المره دى. بالمناسبه انا مره حلمت، انى واقف بتكلم معاكم وانتوا مش شايفنى ولا حاسين بوجودى كأنى هوا، لا حد بيرد عليا ولا بيعبرنى. تصوروا؟ لا احد يرد عليه

سراج: انتوا مابتردوش عليا ليه؟ اوعوا تكونوا صدقتوا الكلام السخيف اللي اتقال في المحكمه.ع العموم انا ضامن انى هطلع براءه ان شاء الله. انا مش سبب في اللي الحاجات الوحشه اللي بتحصل. ثم انا حلمت احلام كويسه ومش لنفسي بس، لكو كلكوا، مش ذنبي ان الكوابيس هي اللي اتحققت.

يظل البعض صامتا، البعض يدندن، احدهم يتحدث في التليفون

سراج: بدهشة انا في حلم ولا علم؟ نفس الموقف دا مر عليا قبل كده.

زمیل: واحد شای تقیل یا مدبولی

الفراش: من عنيا يا استاذ

سراج: والكلام دا سمعته بالظبط، نفس الكابوس اللى شفته كأنه بيتكرر مش ممكن تكون الاحلام بتحقق فعلا، دى تبقى غريبه، انتو مش شايفنى فعلا ولا بتوهم؟ قولوا انكم بتستعبطوا، عاملين حساب فؤاد بيه وخايفين منه.

زميل: عن اذنكم انا رايح دورة الميه

زميل: اناعايز امر على الورش

زميله: خدني معاك.

سراج: اذا كنتوا بتتهربوا منى. طظ فيكم كلكم.

الموظفون يخرجون

سراج: انا تعبان رأسه تغفو ثم يرفعها بسرعه بس مش لازم انام، لو نمت جايز احلم انا بس هريح ضهري ينكفئ على المكتب ويروح في النوم فورا

موسيقي مناسبه – اضامه على مكتب فؤاد

فؤاد : هيه،، شايفه ايه؟

حنان: شایفه حضرتك جای من بعید، راكب حضان ابیض فی ابیض

فؤاد :حصان ایه یا حنان؟انا برکب مرسیدس قوة میت حصان.

حنان: شايفه حضرتك واقف في مكان عالى.

فدواد: انا مکان عمالی فسعملا ومرشح ابقی نائب وزیر، انا عمایز حلم رومانسی جمیل

حنان: ما انت واقف في مكان كله خضره وزرع.

قؤاد: الله. أهو كده. الخضره في إلحلم خير هيه وأيه كمان؟

حنان : وفيه كمان قدامك بحر ميته صافيه ورايقه.

قؤاد : هايل، الخضره والماء يبقى مش ناقص غير الوجه الحسن.

حنان : مش فاهمه.

فؤاد: هتسبینی واقف فی المکان دا کله بطولی، مافیش حد یونسنی؟ انتی عایزانی ازهق وارمی نفسی فی البحر؟

حثان: لأ بعد الشر عليك يافندم، فيه واحده بنت اهه وانت رايح لها.

فؤاد: انا ماروحش لحد. اللي عايزني يجييني. لعلمك، انا تقيل قوي.

حنان: قصدى هي اللي جايه بتجرى عليك.

هٔ داد: يبقى بتحبني.

حنان: ط.. طبعا.

فؤاد: الله حلم جميل بشكل.

اضامه على مكتب سراج

سراج: يصحو مفيقا بفزع اللهم اجعله خير.

حنان: بعنى هتسامح سراج؟

فؤاد: لأ ارجوكي ماتصحيش، نامي وكملي لي الحلم السكرتيره تنصت على باب فؤاد ثم تتحرك ضياحكه

سراج ينهض ويتحرك مفكرا فيلتقى بالسكرتيره التى ترتبك

سراج: ماشوفتیش حنان؟ انتی کمان مابتردیش؟ مالك؟

سكرتيره: تتراجع لغرفه فؤاد وتقف امامها مش جوه، ممنوع الدخول

سراج: يزيحها ويدخل

فؤاد: احكى لى البنت في الحلم بتقولى ايه؟

حنان: بتقولك بحبك.

سراج: لنفسه انا في حلم ولا علم؟

فؤاد : مره واحده بس؟

حنان: بحبك.. بحبك.. بحبك.

سراج: خاينه.. سافله.. منحطه

حنان: سراج، ماتفهمش غلط. سيبنى اقولك..

سراج: قوليلي اني نايم وبحلم بنفس الكابوس.

فؤاد: لأ، انت صاحي بس مش فاهم اللي بيحصل.

سراج: اذا كنت صاحى يبقى الطم اتفسر

حنان: بس أنا ماخنتكش في الحلم. افتكر كويس دا هو اللي كان بيطاردني.

مراج: لا دا كان حلم عبيط خايب. مجرد خيال جميل كنت بتمناه لكن انا فقت م الحلم وفهمت الحقيقه. يلتفت حوله ثم ينظر إلى فتاحة الاوراق على مكتب فؤاد ويمسكها فؤاد يجرى خارج الفرفه الى مكتب الموظفين

حنان: لا ماتتهورش يا سراج. هتثبت ان احلامك بتحقق.

سراج: مااتهموني وخلاص مش هخسر شئ لما اخليها حقيقه.

حنان: تذهب للباب وتصرخ الحقوني ياناس.

فؤاد: ارجوك ماتقتلنيش.

بيخل المظفون

سراج: عرفت دلقوتي ان الأحلام عشان تتحقق لازم لها قوه وأراده عشان تتنفذ؟

فؤاد: ايره عرفت وصدقت، بس ماتقتلنيش

سراج: وانا عندى اراده وقوه تخليني اقتلك ولا ماعنديش؟

فؤاد : بخوف عندك .. عندك

سراج: لا انت غلطان. انا ماعندیش لا قوه ولا اراده. وعشان کده مقدرش اقتل فرخه. یلقی بالسلاح کل اللی اقدر علیه انی احلم وبس ومع ان هی دی تهمتی الوحیده.

اظــــــلام

المشهد التاسع

المنظر: المحكمه

يدخل بليغ وخليل في البدايه ثم بقية الجمهور تباعا

بليغ : انا خلاص حطيت ايدى في الشق من قريبك وقربت انا كمان انسحب م القضيه.

خليل: خليل: عارف بقية الاتعاب لسه ماخدتهاش لكن قريب ان شاء الله لل...

بليغ: ماعادش تهمنى الاتعاب ولا هو شخصيا يهمنى، اللى حازز فى نفسى انها هتبقى اول قضية اخسرها ف حياتى، سمعتى معرضه للضياع بسببه.

خليل: ع العموم هو اتهد واتغير شويه عن الاول

يظهر سراج مقيداً هذه المره وبراه مجهدا

بليغ: كلمه انت يا خليل انصحه

خلیل : حاضر

سراج: ازیك یا متر

بليغ: انا ماليش كلام معاك ويبتعد مشيرا الى خليل ان يحدثه

خلیل : ازیك یابن خالتی؟ أوعی تكون لسه زعلان؟ بس انا كان لازم انفد بروحی،

سراج: انا ماعدتش زعلان من حد غير نفسي.

خليل : ربرافو عليك، اهو كده ابتديت تعقل

سراج: هو انا مجنون؟

خليل: بالعكس، بس انت اللى جبته لروحك، العاقل ياخد الناس على قد عقولهم، شوفهم عايزين ايه واديهم اللى هما عايزينه ينبسطوا منك ويفوتوا لك

سراج: بالبساطه دی؟

خليل: ايوه يعنى هي بتلزق؟ ماتبقاش عبيط امال.

سراج: اعترف عشان يطسوني حكم وبكده ما بقاش عبيط.

بليغ : ولا حكم ولا دياولوا، انت هتقول انا كنت وحش وكخه وعبيط وراكب دماغي بس انا توبت وانبت وبتعالج.

سراج: وبعدين

بليغ: هيرتاحوا وينبسطوا انك طلعتهم نبها وشرفا وعندهم اخلاق، تقوم تاخد حكم مخفف، يمسحوا مخك م الاحلام سنه ولا اتنين ويمكن الحكم يبقى مع وقف التنفيذ.

كل اللي عايزاه النيابه م القضيه انها تقر المبدأ وبس.

خليل: وغير دا كله اسمعها منى انت غلطت واحلامك خطرة فعلا، انا كنت فاكرك مظلوم بس لما سمعت اللى قاله وكيل النيابه اقتنعت.

سراج: انا الظاهر عليا غلطت فعلا مدام كلكوا شايفين كده. انا نفسى اتصدمت فى احلامى اكتشفت انها احلام غلط ساذجه خياليه، المجتمع اللى فى خيالى مش ممكن هيتحقق وحنان اللى كانت فى خيالى مألات فى خيالى مكانش لها وجود. فى الواقع م الاصل

بليغ: اعترف انت بس ومابقاش انا بليغ لو ماجبتلكش حكم مع وقف التنفيذ.

سراج: بعد ما حنان خانت حلمنا ماعتدش مهتم ادافع عن نفسى. بالعكس ياريتهم يحكموا عليا يمسحوا مخى م الاحلام، عشان ارتاح.

يدخل الجمهور تباعا ثم هيئة المحكمه

القاضى: النيابه تتفضل

النيابه: حضرات القضاه، ان واقعة اعتداء المتهم على فؤاد بيه الشماشرجي تقدم لنا دليلا جديدا على ان الطم فكره سرعان ما تخرج الى حيز التنفيذ.

مخلص يبخل فجأة

مخلص: احتج واشجب بشده.

القاضى: انت مش كنت انسحبت يا استاذ؟

مخلص: وتراجعت لك احتج. التهمه الموجهه لموكلي هي الحلم. اما الواقعه الجديده فمكانها محكمة الجنح.

النيابه: واقعة الاعتداء متصله بهذه القضية لانها مجرد تنفيذ لحلم المتهم. بليغ: لا مانع لدينا. لكن الامر كله مجرد شجار بالكلام. ومحصلش ان

موكلى أن اعتدى على فؤاد بيه وهو مستعد يتأسف له ويبوس راسه وإنا كمان بتأسف وابوس راسكم.

النيابه: لكن سبق وضربه في الحلم بنفس الفتاحه. ثم لولا دخول زمايله في الوقت المناسب كان قتله ودا ثابت بشهادتهم. اذن نحن امام جريمة شروع في قتل سبق وان حلم به المتهم.

مخلص: المعروف ان الاحلام بتمثل المضاوف اللي بتنتاب الانسيان. ولما الاستاذ سراج لقى خطيبته في موقف مع الاستاذ فؤاد.

فؤاد : مقاطعا مش صحيح انى غازلت الانسه واسالوها. هو اللى فهم الموقف غلط، حاولنا نشرح له مارضيش يفهم.

القاضى: الكلام دا صحيح يا سراج؟

سراج: معرفش.. اللي تحسبوه

بليغ: لا مانع لدينا لهذا التفسير

القاضى: وايه اللى خلاك تختار تضربه بفتاحة الورق بالذات؟ هل لانه نفس السلاح اللى شفته في حلمك؟

سراج: يجوز.. اللي تحسبوه

بليغ: لا مانع لدينا ايضا لهذا التفسير.

مخلص: لا مانع ايه، انت بتثبت التهمه على موكلى؟

بليغ: موكلي هو اللي فاجئني برغبته في الادلاء باعتراف كامل. وارجوكم تسمعوه

القاضى: اتفضل يا سراج، عايز تقول ايه؟

سراج: انا اسف اذا كنت اتهورت على فؤاد بيه وحزين بسبب حريق المؤسسه، بس اقسم لكم انى ماكنتش اعرف ان الكوابيس دى

ممكن تتحقق.

القاضى: يعنى مقر بذنبك يا سراج وانك المسئول عن احلامك؟

سراج: انا حاسس انی ارتکبت ذنب وندمان علیه، ولو انی مش عارف هو ایه.

القاضى: وايه اللي دفعك للإحلام دى؟

سراج: يمكن بسبب عيشتى في الترب وصحيانى كل يوم على صوت الصريخ والندب. انا خايف اكون سبب بلاوى كتيره لمجرد انى حلمت بيها، انا سبب الزلازل والسيول. يمكن بسبب..

بليغ: هامسا قول الشيطان.. الشيطان

سراج: يمكن بسبب الشيطان، ، الشيطان هو اللي بيوزني.

تصفيق من جمهور الحاشرين

انا يا حضرات بقالي اسابيع مابنامش. خايف انام احلم.

الام: يا خيبتك يا سراج، هما لعبوا في دماغك انت كمان؟

سراج: مدام كلهم شايفين كده حتى الاستاذ بليغ.

مخلص: اذن انا منسحب ومتبرأ من الدفاع عن موكلى واشجب موقفه واندد بموقف زميلى المحامى واعترض على تشكيل هذه المحكمه من الاصل، وانا مهاجر

القاضى: الدفاع يتفضل

بليغ: حضرات القضاه.. حضرات السنشارين

سمعتم بأنفسكم أن موكلى أصبح لا يكره في الدنيا مثل الاحلام.. ثم اعترف طائعا أن الشيطان قد وزه، ونحن نعلم أن الشيطان شاطر. فما بالنا اليوم نتشطر على هذا الشاب لنحاكمه هو مع أنه ضحية الشيطان ليس أكثر؟

سراج: يشرد وهو مفتوح العينين ورأسه تغفو

موسيقي مناسبه تبدأ خافته كأتها أتيه من بعيد.

بليغ: ولهذا فأننى ارجو أن تأخذكم الشفقه بموكلي واطلب له الرافه

والرحمه، فالرحمه فوق العدل...

يضتفى صدوت بليغ ونراه يحرك شفتيه فقط بينما تعلو الان الموسيقى الاضاء تشحب وتتركز على سراج لنرى تعبيرات على وجه كأنه يحلم الموسيقى تخفت بسرعه وتعود الاضاء كما كانت ويعود صوت بليغ.

بليغ: وهكذا يتضع لعدالتكم ان موكلى كان حسن النيه وانه فى هذه القضيه.. وانه ندم واسف على ما فعل بل وتاب واناب وتعهد ووعد بأن لا يعود الى مثل هذه الاحلام أو غيرها وان.....

سراج: يصدر عنه غطيطا

القاضى: لحظة يا استاذ بليغ.. فوق موكلك الاول.

بليغ: ينظر لسراج فيجد عينيه مفتوحتين موكلي صاحى وعينيه مفنجله اهو يافندم

القاضى: عينيه مفنجله انما نايم وهو واقف، فوقه.

سراج: يصدر غطيطا اعلى

بليغ: الله يكسفك. سراج. انت يابني ادم يهزه بعنف

سراج: ينتفض مذعورا اللهم اجعله خير.

بليغ: وقعتك سوده. وبعدين فيك، حلمت بأيه المره دى؟

سراج: هامسا أن المحكمة وقعت أتهدت على دماغ اللي فيها.

بليغ: الله. بكده اضمن لك تأبيده يا حلو.

النيابه: فيه حاجه الدفاع عايز يقولها للمحكمه؟

بليغ : ايوه فيه وكاتم الشهاده شيطان اخرس. ولا على ايه ما انتوا مسيركم تعرفوا كل حاجه صوت وصوره.

القاضى: كمل مرافعتك يا استاذ بليغ

بليغ : حضرات القضاه .. حضرات المستشارين .. انا ماليش دعوه بأحلام موكلي

سراج: حتى انت يا بليغ؟

بليغ : متأخذنيش انا ضامن تحلم بكره بأيه؟

القاضى: قصدك ايه يا متر؟

بليغ: يا سيادة الرئيس انا مش مجرد محامى بأدى وظيفه عشان اكل منهاعيش وحتى بقية اتعابى ماقبضتهاش ومش عايزها. أناهنا ببحث عن الحق مثلكم تمام ولم يعد قلبى يطمئن لاحلام موكلى. وتبيت اضرارها وخطورتها على المجتمع وبما انى احد افراد هذا المجتمع الذى يمكن ان يصيبهم الضرر فأنى افضل ان انسحب من الدفاع عن المتهم وافوض امره لعدالتكم والسلام عليكم ورحمة الله.

سراج: يدق كفا بكف لا حول ولا قوة إلا بالله.

بليغ يخرج

القاضى: يا سراج.. تحب المحكمه تنتدب لك محامى يترافع عنك؟

سراج: لا يافندم.

القاضى: ماينفعش تدافع عن نفسك.

سراج: انا بقيت حاسس كأن الاحلام واقع والمحكامه دى هي الكابوس.

مش عايز غير انكوا تحكموا عليا وتخلصوني

تبخل حنان

حنان: لحظة يا سيادة القاضي.

القاضى : فيه ايه؟

حنان: انا امبارح حلمت.

القاضى: واحنا مالنا؟ ماحدش وجه لك له تهمه.

حنان: انا اللى كنت مع سراج في الطم وانا اللى كنت مع فؤاد بيه في المان : الواقع. وجايه اعترف واشهد بالحق.

سراج: وانا رافض شاهدتها. شهادتها زور.

حنان: حلم سراج اتحقق بالظبط یافندم، فؤاد بیه، حاول یغتصب عقلی وروحی حاول یحرمنی من حلمی مع سراج.

سراج : كذابه خاينه، انا شفتك بعنيا مع فؤاد وانتى راضيه

حنان: كذب عينيك وصدق حلمك، لانه اصدق يا سراج.

النيابه: يافندم الشاهده غيرت موقفها

حنان: ایوه. انا شهدت زور لما اتبرأت من احلام سراج. انما داوقتی بطلب منکم تعتبرونی شریکه متضامنه فی کل احلامه. ومش هو بس اللی بیحلم، انا کمان بحلم. حلمت بیه وحلمت بکل الناس اللی اعرفهم، احلام غریبه مالهاش دعوه بالمنطق بتاعکم، مالهاش دعوه بقوانینکم، لکن للاسف.. عمری ما کانت عندی الشجاعه انی اصارح حد بیها ولا حتی افکر فیها مع نفسی.

سراج: حنان.. انتى جايه تدافعي عنى ولا تضيعي نفسك معايا؟

حنان: انا جايه احقق لك اجمل حاجه في حلمك.

سراج: مش وقت شعر وعواطف، خلينا في الواقع..

حنان: طظ في الواقع والمنطق.

سراج: بالشكل ده هيحكموا عليكي.

حنان: انا اتحكم عليا من يوم ولادتى يتفسل مخى من الاحلام.

سراج: انا باطلب التأجيل يافندم.

حنان: انا اعترض.

القاضى: ماتزعليش، اتفضلى خشى معاه القفص.

حنان تبخل القفص

حنان: بارك لي يا سراج، اتفك سجني

سراج: یا خیبتك یا حبیبتی

النيابه: الان وقد وضحت الحقيقه. النيابه تطالب بالحكم عليهم فورا وبأقصى عقوبه ممكنه.

سراج: لا استنوا. انا هعترف

حنان : سراج..

سراج: حضرات القضاه... انا معترف

وبقر امام حضراتکم إن انا مختلف احلامی جریمتی فی عرقگم،

لان الحق غايب عنكم احلامي حقيقتي كينونتي وشخصيتي الامر الواقع بكره هينتهي والحلم خالد على مر الزمن غصب عنكم. كل الاحلام جميله والسياده في النهاية للخيال كل الاحلام حقيقة وبقاء الحال محال.. بقاء الحال محال انا معترف وبقر أن أنا مختلف. حلمت بکل دا وبأكتر من كدا بحلم لكم. لكو كلكم. وبقولهم ويقولكم احلموا. احلموا احلموا على قد ماتقدروا. وفوقوا. وحققوا حلمكم

ستار النهاية

لينين الرملي ملخص السيرة الذاتيه

- . كاتب حرمتمرغ للكتابه لا يعمل لدى اي جهه.
 - ـ ولد بالقاهره في ١٨ اغسطس ١٩٤٥.
 - .متزوج وله ولد وينت.
- . نشر اول قصة بمجلة صباح الخير عام ٥٦ وصدرت له اول قصه منشوره في كتاب عام ٥٨ وهو في الثانية عشرة ١
- ـ بالكريوس للتليفزيون من عام ٦٧ هكتب عدة تمثيليات ومسلسلات نالت جماهيريه واسمه منها (فرصه العمر ـ حكايه ميزو ـ شراره ـ مبروك جالك ولد ـ هند والدكتور نعمان)
- . كتب عشرة الفلام سينمانية منها (البداية) مع صلاح ابو سيف الذي حصل على الجائزة الاولى في مهرجان فيفاي للافلام الكوميدية عام ٨٦
 - وفيلم (الارهابي) عام ١٩٤ الذي كان اول نتحد هني للإرهاب في مصر.
- ـ من عام ٧٤ بدأت شهرته ككاتب مسرحى مع اول عرض لهـ ومن وقتها، لا يمر عام دون ان تعرض له مسرحيتان او ثلاث كل عام.
- . له ٢٩ مسرحية قدمت على معظم خشبات المسارح المسريه وتعيد تقديمها مسارح الهواه والجامعات والشركات والثقافه الجماهيريه. وحققت هذه الاعمال نجاحا ماديا وفنيا واعترف اغلب النقاد بأنها حققت المعادله الصعبه في المزاوجه بين المتعه والمكر. منها مسرحيات انتهى الدرس ـ سك على بناتك ـ سعدون المجنون .
- كما شارك في انتاج ستة من مسرحياته هي (الهزوز. انت حر. الهمجي. تخاريف. وجهة نظر. بالعربي الفصيح) والاخيره قدمها من خلال مجموعه شبان من الهواة ورغم ذلك اثارت ضجه كبري في مصر والعالم العربي وتابعتها بالكتابة كل وكالات الانباء العالميه
- ـ من عام ۸۹ سعى مسرح الدوله الى تقديم اعماله فعرض له المسرح القومى (اهلا يا بكوات) في ۸۹ ثم (وداعا يا بكوات) ۹۷ وحققت الاولى اعلى اقبال جماهيرى واعلى ايرادات في تاريخ مسرح الدوله منذ تأسيسه في الثلاثينيات. ومثلت المسرحيه مصر في مهرجان بفداد للمسرح ومهرجان قرطاج في تونس وكانت اول صبيحه في المسرح ضد الانجاهات السلفية.
- كذلك عرضت له فرقة المسرح الكوميدي للدولة مسرحيتين كانتا من انجح عروض هذه الفرقة هما (عفريت لكل مواطن) عام ١٨٨و (اللهم اجلعه خير) عام ٩٧.
- ـ من عام ٩٢ اسس بمفرده فرقة واستديو (٢٠٠٠ فكتب وانتج عددا من المفامرات المسرحية مثل (الحادثة ـ وجع الدماغ ـ جنون البشر) ومسرحيات تجريبيه قصيره في اول سابقة من نوعها في القطاع الخاص وهي (الكابوس) ومثلت مصر في مهرجان قرطاج بتونس عام ٩٢ و (العار)و (مجد وغلب).
- ـ له تسع مسرحیات منشوره و خمس مسرحیات مترجمه ومقالات مختلفه بالصحف والمجلات المسده.
 - . عضو بلجنة التفريغ ولجنة السرح بالمجلس الأعلى للثقافه.
- . في حين نتعظى اعماله غالبا بنجاح جماهيري وتختاره كل استفتاءات الرأي في العشر سنوات الاخيره على التوالى كأفضل كاتب مسرحي فإن نفس هذه الاعمال تثير عادة جدلا واسعا بين النقاد والكتاب والصحفيين بين مؤيد ومعارض نظرا لما تطرحه من اهكار مختلفه عن السائد والمستقر والتي تتصادم مع بعض الانتجاهات السياسيه والفكريه.
- ـ رغم ان البعض يعتبر مسرحه سياسيا الا انه يرى انه مشغول بقضايا فكرية تدور حول منهج التعكير الخرافي وغير العلمي والتعصب وضيق الافق ونفي الاخر والسفلية وهمجية الانسان والخواء النفسي وقوة الجهل والعلاقة التراجيدية بين الشرق والفرب.



Bibliotheca Alexandrina 0403695

26

واحد جنيه الأمل للطباعة والنشر